



# Wantok

PNG Phones Against  
SMS  
16321  
It's FREE & ANONYMOUS  
CORRUPTION

Isu Namba 2327 Me 2-8, 2019 28 pes

Niuspepa Bilong Yumi Ol PNG Stret! **K1 tasol**



**FREE** FOR ANY LENOVO OR HP CELERON LAPTOP K50 GIFT + CARD  
THEODIST BACKPACK



WHILE STOCKS LAST,  
LIMIT 1 PER CUSTOMER  
TERMS & CONDITIONS APPLY  
SEE IN STORE

POM: 313 9800 / 7232 1300 / 321 5667 E-mail: sales@theodist.com.pg | LAE: 472 5488 / 7054 4494 / 472 7838 E-mail: saleslae@theodist.com.pg

## Oposisen redi long kamapim Vot i Nogat Bilip

*i go moa long pes 2..*



**GUTPELA YUMI BUNG:** Taim Papua Niugini i kisim Independens em i kamapim poroman wantaim planti arapela kantri long wol. Dispela ol kantri i gat mausman o meri i makim kantri bilong ol na stap long Pot Mosbi. Long wankain taim, PNG i salim ol mausman o meri bilong em i go long dispela ol kantri. Taim mausman o meri ol i kolim hai komisina o embeseda i save kam, namba wan samting ol i mekim em long bungim na salim gritings bilong ol i go long Gavana Jeneral. Long Tunde Gavana Jeneral, Sir Bob Dadae long namba wan taim i holim wanpela bung long amamasim ol hai komisina na embeseda. Poto i soim Sir Bob i kisim piksa wantaim dispela ol lain manmeri. *Poto: Nicky Bernard*

  
**The Catholic Reporter**  
Mun  
Me 2019  
Isu i stap insait -  
P 13,14,15, 16

**DOUBLE  
DOUBLE  
DATA**  
Lukim **P7** lo moa toksave



**Kraft Heinz**  
GLOBAL QUALITY STANDARD

**WHITE TUNA FLAKES  
MAKE NO MISTAKES**



MP\_1920078

**i kam long pes 1.**

**Oposisen redi long kamapim vot i Nogat Bilip**

OPOSISEN i redi long kamapim vot i no gat bilip taim palamen i kibung gen long neks wik Tunde i go.

Wanpela strongpela mausman bilong Oposisen na Sedo Minista bilong Atoni Jeneral na Memba bilong Sinasina Yonggomugl, Kerenga Kua i tokaut long ol tok-tok bilong em long dispela wik.

Mista Kua i tok O'Neill i mekim planti asua na i no ranim gut kantri na olsem gavman bilong em i mas senis.

Em i mekim dispela tok tu long taim sampela ol memba long gavman i risain long gavman olsem memba bilong Pipels Nesenel Kongres pati na olsem ministia bilong gavman.

Em i givim tok lukaut long ol pablik sevan olsem ol i mas was long kain askim ol memba bai mekim long kisim mani na ol yusim ol pablik samting long helpim ol yet long dispela taim we ol toktok bilong senisim gavman i wok long kamap.

Wantok Niuspepa i bin ringim opis bilong Spika long painim aut sapos i gat wanpela mosen bilong Vot I Nogat Bilip i stap long notis pepa bilong Palamen kibung neks wik i go tasol i kisim tok olsem dispela i no yet taim em i go long prin.

"Mi askim ol kain opis olsem Treseri, Kumul Konsolidetet Holdings, PNG Geming Bod na MRDC (Mineral Risos Developmen Kampani) long ol i no ken pilai politik na harim tok bilong ol memba.

"Mipela i no laikim pasin bilong yupela i yusim pablik risos long helpim narapela long helpim ol yet.

"Mipela i lukaut long pasin bilong printim ol sek mani we i no gat tok orait long en.

"Ol pablik sevan i mas

**Sir Mekere hatim O'Neill long Papua LNG**

Memba bilong Mosbi Not-wes, Sir Mekere Moraut i tok bikpela tekis konsesen gavman i givim long Papua LNG join vensa patna, i daunim tru intres bilong kantri, ol papagraun na ol PNG bisnis.

Em i tok Praim Minista Peter O'Neill wantaim ol lain bilong em i hait na pasim tok wantaim ol developa long givim nating planti bilien Kina em kantri inap long kisim long Konsolidetet Revenu, insait long 25 yia laip

**Kua askim gavman opis, benk long was**

SEDO Atoni Jeneral na Memba bilong Sinasina Yonggomugl, Kerenga Kua i askim ol pablik sevan long ol i mas was long no ken yusim nating pablik mani.

Em i askim ol benk tu long ol i no ken givim aut pablik mani bihainim ol askim ol memba bilong palamen i mekim.

Em i mekim dispela tok long taim ol toktok bilong kamapim Vot-I-Nogat-Bilip long gavman bai kamap taim palamen i holim narapela kibung bilong em we i stat long

bilong dispela projek. Sir Mekere i tok O'Neill i no bin larim Stet Negosieting tim na Dipatmen bilong Petroleum long stap insait long dispela toktok na bai i kostim kantri planti mani tru.

Em i tok ol dispela konsesen i stap long Papua LNG Gas Agrimen em Mista O'Neill i bin tok orait long en bigin bilong dispela mun na i bihainim ol arapea em ol projek developa olsem Total, ExxonMobil na Oil

neks wik Tunde 7 Me i go.

Em i tok sampela ol memba bilong palamen long las minit bai traim long yusim pablik mani na ol pablik samting long helpim ol yet.

"I gat luksave olsem senis bai kamap yet long gavman," Kua i tok.

"Mi askim ol kain opis olsem Treseri, Kumul Konsolidetet Holdings, PNG Geming Bod na MRDC (Mineral Risos Developmen Kampani) long ol i no ken pilai politik na harim tok bilong ol memba.

**Pati memba no amamas long wei PM wok ... askim long nupela lida**

Las wik Fraide i lukim ol Gavana bilong Hela, Philip Undialu; Sauten Hailans William Powi, Enga Sir Peter Ipatas na Memba bilong Komo Magarima, Manasseh Makiba.

Bipo long las wik em Minista bilong Fainens na Memba bilong Tari Pori, James Marape na Minista bilong Atoni Jeneral na Jastis na Memba bilong Esa'ala, Steven Davies.

Narapela tupela memba husat i no laik long stap wantaim gavman em Gavana bilong Jiwaka, William Tonngap na Gavana bilong Wes Sepik,

Search. "Mi bin harim olsem olgeta dispela konsesen em ol lain bilong Stet Negosiesen tim na Dipatmen bilong Petroleum i bin tok nogat long en.

"Ol dispela samting em i wok bilong Mista O'Neill na ol lain bilong em," Sir Mekere i tok.

Ol takis konsesen emMista O'Neill givim-long kampani em:

• Ol risos ona bai i no inap long kisim gutpela bekim long ol royalti na Developmen na

"Mipela i no laikim pasin bilong yupela i yusim pablik risos long helpim narapela long helpim ol yet.

"Mipela i lukaut long pasin bilong printim ol sek mani we i no gat tok orait long en.

"Ol pablik sevan i mas mekim wok olsem ol i no ken mekim krangki long opis bilong ol na yusim pablik risos long helpim laik bilong wanpela man.

"Mipela bai sutim tok long yu sapos yu no bihainim tok na mekim asua. Lo bai kisim yu."

Tony Wouwou.

Mista Marape long dispela wik i tok wei praim ministia i kamap wantaim ol polisi na mekim ol disisen i no gutpela.

"I no gat gutpela wok bung (namel long em na mipela olsem ministia na memba) long kamapim ol polisi na mekim ol disisen," em i tok.

"Wanpela em wei O'Neill i mekim long sainim Papua LNG agrimen."

Dispela toktok em Undialu tu i mekim.

"Praim Ministia i mekim wanpela agrimen nogut.

Prodaksen levi.

• Gas Agrimen i no karamapim kondenset, dispela i bikpela hap bilong gas projek. Kopret takis bilong gas i stap long 30 pesen, dispela 45-50 pesen gas takis i no karamapim 150 milien barel kondenset. Mani PNG inap kisim long dispela em \$10.5 bilien. PNG i no lainim lessen bilong em long PNG LNG na planti milien takis mani bai i lus nating.

• Mista O'Neill na ol lain bilong em i pasim

rot bilong sans bilong benefit moa yet long Edisinel Profit Takis long taim ol i daunim takis i kam daun long 15 pesen. PNG i no lainim lesen bilong en long PNG LNG.

• Ol narapela samting O'Neill i bin tok orait long en em, no gat GST, no gat takis long long impot duti, na takis long ol samting bilong yusim long projek. Bai i no gat takis long Dividden Withholding Takis na Interest Withholding Takis. PNG bai i no inap kisim

planti bilien Kina long ol dispela takis. PNG i no lainim lesen bilong en long PNG LNG.

Sir Mekere i tok gavman i no bin kisim wanpela komitmen bilong ol developa long lukim olsem i gat mak bilong hamas mani na wok mas go long ol lokal kampani na pipel.

"Mista O'Neill i mas tok savee long PNG na ol bisnis na ol risos ona watpo na em li putim aik bilong Total, Exxon-Mobil, Oil Searrch na ol arapela lain i go pas."

**Namah amamas long Marape na Davies**

Paul Zuvani i raitim

Tony Wouwou.

LIDA bilong Papua Niugini (PNG) pati na Memba bilong Vanimo-Green, Belden Namah i tok em i amamas long disisen tupela ministia bilong O'Neill Gavman i mekim long lusim gavman.

Em i tok disisen bilong Fainens Minista, James Marape na Atoni Jeneral na Jastis Minista, Steven Davies i soim olsem tupela i trupela lidaman.

Em i tok tu olsem disisen bilong dispela i soim olsem O'Neill i no gat rispek long ol ministia bilong em na i no save ranim gut kantri.

Long nau yet 8-pela memba long O'Neill Pipels Nesenel Kongres (PNC) pati i tokaut long ol bai risain long pati.

Dispela ol lain em Marape, Davies, Enga Gavana Sir Peter Ipatas, Hela Gavana Philip Undialu, Sauten Hailans Gavana William Powi, Komo Magarima memba, Manasseh Makiba; Manus Gavana Charlie Benjamin na Okapa memba, Saki Soloma. Narapela memba husat i no laik long stap long sait bilong Gavman em Jiwaka Gavana em Dokta William Tonngap na Gavana bilong Wes Sepik,

Ol i tok O'Neill i no wok wantaim ol Ministia long kamapim ol wok na sainim Papua LNG projek agrimen i wanpela long ol bel hevi.

Marape i askim praim ministia long risain na larim nupela man i kisim ples bilong em.

"Mi amamas long disisen em tupela Minista i mekim," Namah i tok.

"Tupela i soim tru pasin bilong lida.

"Tupela i putim laik bilong ol pipel i go pas long laik bilong tupela."

Mista Namah i askim ol arapela ministia na memba long lusim gavman long sevim kantri.

Tasol O'Neill long wanpela bung long Kagua Erave taim em i lonsim wanpela milien kina pawa projek i no longtaim i go pinis i tok gavman bilong em i stap strong yet.

Em i tok gavman bilong em i no surik long ol kain toktok bilong senisim gavman.

Em i tok gavman i gat olsem 70 memba i stap long sait bilong em we bipo i no gat gavman i gat kain namba olsem.

"Em bai olsem, taim gavman I lusim namba, Oposisen bai kisim namba," O'Neill i tok.

**SYDNEY Your Only Direct Choice!**

- Ex Pom 2x weekly
- Enjoy complimentary food & beverage service
- Enjoy inflight entertainment
- Free 30kgs baggage allowance
- Business class offer
- Our Melanesian hospitality never left Australia

**Air Niugini**  
www.airniugini.com.pg

For bookings call  
Toll Free on 180 3444  
7373 2100 / 7104 3444

# LLG ileksen go het

ILEKSEN bilong lokal level gavman (LLG) bai go het nau, nupela Minista bilong Atoni Jeneral na Jastis, Alfred Manase i tok.

Em i tok aninit long Oganik Lo bilong Provinsal na Lokal Level Gavman, wok bilong givim aut rit (writ) bilong LLG ileksen i stap long han bilong Minista bilong Intagavman Rilesen.

Long dispela as ol ileksen rit bilong LLG em Minista bilong Intagavman Rilesen, Kevin Isifu, i givim aut long las wik Fraide i orait na olsem ileksen i ken go het.

Em i mekim dispela tok bihain long em i glasim gen olsem kot em Umi LLG, Is Sepik Provinsal Gavman na Ombudsmen Komisni i bringim i go long Suprim Kot long kamap

bilong LLG ileksen i go egens long Ilektoral Komisni na i no go long Minista bilong Intagavman Rilesen.

Suprim Kot we Sif Jastis Sir Gibb Salika, i wanpela i sindaun long em i mekim disisen olsem LLG ileksen i no ken go het.

Dispela i mekim Minista na Komisni i no go het long ranim ol wok bilong ileksen long las wik Fraide.

Tasol nau olsem Mista Manase i tok dispela kot i go long Komisni na i no Minista, Minista nau i fri long tok long ileksen long go het.

Em i tok wok bilong givim aut rit i stap long han bilong Minista na i no Komisni.

Kot i go egens long Komisni we em i no wok

bilong Komisni long givim aut rit.

Tasol pastaim long dispela Suprim Kot disisen i kamap, Ilektoral Komisina, Patilias Gamato i tok

Gavman i givim pinis K100 milien long holim dispela ileksen na Komisni i redi long holim ileksen.

Ileksen bai kamap long 20 provins tasol Nesenel Kapital Distrik (NCD) na Atonomus Rijn bilong Bogenvil (ARB) bai no gat.

Dispela em bikos NCD i holim LLG ileksen pinis long las yia Septemba na ARB i wok long redi long holim referendum bilong ol long Oktoba.

Long dispela taim ol manmeri i no inap long votim ol kaunsil presiden.

Oganik lo long ileksen bilong LLG i senis na ol

kaunsil nau bai votim ol LLG presiden.

I gat moa long 6300 wot na 331 lokal level gavman.

Wok bilong LLG ileksen bai kamap long dispela ol de:

Gavman Haus bai givim aut Rit (Writ) bilong LLG ileksen long 25 Epril na nominesen bilong wot kaunsil bai op long dispela taim;

Nominesen i pas long 2 Me;

Vot bilong ol wot kaunsil bai stat long 9 Me i go long 22 Me; na

PNGEC bai kisim ol Rit i go bek long Gavman Haus long 13 Julai.

Gamato i tok bihain long dispela ol kaunsil bilong wan wan ol LLG bai go bung long semba bilong ol na votim presiden bilong ol.

# PNG NRI makim nupela Deputi Dairekta

PAPUA Niugini Nesenel Risets Institut (PNGNRI) i tokaut long dispela wik olsem ol i makim pinis wanpela nupela deputi dairekta bilong Risets na em bai kisim opis stat long 5 Epril, 2019.

Asosiet Profesa Ezebilo i no nupela man long Institut tasol PNG NRI Kaunsil i bin bihainim gut olgeta rot bilong kisim nupela man long kain opis olsem, aninit long ol polisi na lo na makim Asosiet Profesa Ezebilo long kisim dispela opis.

Eking Siaman bilong PNG NRI Kaunsil, Wilson Thompson, i tok klia olsem olgeta wok bilong makim ol senia menesmen posisen i save gat strongpela rot bilong skelim, glasim gut na makim man o meri.

Bihainim Seksen 23 bilong Nesenel Risets Institut Ekt 1993, PNG NRI Kaunsil, olsem bodi lukautim Institut, i gat pawa long makim ol wokman bilong Institut aninit long ol bai lo na wei bilong wok long Institut.

Mista Thompson i tokaut long disisen bi-



Asosiet Profesa Eugene Ezebilo, kamap nupela PNGNRI Deputi Dairekta long Risets

long kaunsil olsem, "PNG NRI i laki long gat kain man i gat save olsem. Olgeta save na ekspirians bilong Asosiet Prof. Ezebilo i strongim moa save bilong wok risets, pablikesen, pablik polisi edvokasi na riserts komyunikesen na strongim yet wok bilong mipela olsem ThinkTank bilong Pablik Polisi long kantri."

"PNG NRI Kaunsil wantaim ol NRI Menesmen na Wokman na wokmeri i tok amamas long Asosiet Prof. Ezebilo," Mista Thompson i tok.

Assoc. Prof. Ezebilo

em i gat inap save long kisim dispela opis na em i gat bikpela ekspirians long wok bilong risets menesmen na pablikesen. Em i save givim kaunseling, mentoring, wokim PhD rivi na editing. Em i gat luksave tu olsem wanpela Pos Greduet Ek-samaina na Riviuablong intenesenel jenel. Em yet i bin pablisim o raitim planti olpepa na buk inap long 56 pablikesen olgeta.

Assoc. Prof. Ezebilo i bin kam insait long Institut long 2015 olsem wanpela Senia Risets Felo wantaim Propeti Sekta Developmen Risets. Long 2016, ol i makim em olsem Program Lida na bihain ol i makim em olsem PNG NRI Mausman bilong ol wokman na wokmeri long PNG NRI Kaunsil.

Em i bilong Sweden na em i gat PhD long Ikonomiks long Swedish University of Agricultural Science (2010) long Sweden. Em i gat 9-pela yia wok ekspirians olsem wanpela leksera na 20 yia profesenel ekspirians long risets wok.

# Ol 1, 221 man meri greduet long UPNG



Ripota bilong Wantok Niuspepa Benorah Carrie Hesehing i bin amamas na redi long kisim pepa bilong em long UPNG. Poto Jacklyn Kimala

## Jacklyn Kimala i raitim

YUNIVESITI bilong Papua Niugini (UPNG) i bin holim namba 64 greduesen bilong en, las wik Fraide long Pot Mosbi.

Pablik Rilesen na Maketing Menesa Jim Robins i tok dispela yia namba bilong ol sumatin husat i greduet em 1, 221.

"Greduesen i bin stat long moning wantaim ol sumatin husat i bin kisim Skul bilong Marasin na Helt Sains, Skul bilong Ekselens Pisikol Sains na

Lo skul na long wankain taim long apinun em Skul bilong Binis na Pablik Polisi, Skul bilong Humaniti na Sosel Sains, na tu ol Pos Greduet husat i bin kisim skolasip awot," Mista Robins i tok.

Mista Robins i tok ol lain husat i bin salensim ol yunivesiti memba i bin laik boikotim dispela dispela greduesen tasol i no bin kamap bihainim tingting bilong ol, long wanem em laik bilong ol sumatin na arapela het bilong wan dipatmen long holim

dispela greduesen.

"Bikpela samting em ol sumatin na Dean i bin wanbel na bung wantaim long holim greduesen na kisim setifiket bilong ol," Mista Robins i tok.

Em i tok pawa i stap wantaim ol sumatin na lain husat go pas long lukautim yunivesiti long soim gutpela piksa bilong yunivesiti na mekim 64 greduesen kamap gut.

"Dispela em greduesen de we ol pipel i bin kam lukim na ol i rispekim dispela impoten bilong de bi-

long ol sumatin husat i bin stap long yunivestiti long las tripela yia, foapela yia o faivpela," em i tok moa.

"Mi bai i no inap toktok long namba bilong sumatin insait long Sains dipatmen husat i bin inap long greduet long dispela yia, tasol dispela i mas gat hevi long Edministretiv o Ekademi sait na i no baim ful skul fi bikos dispela ol tripela impotmen lo em ol sumatin i mas bihainim long kisim setifiket bilong ol," em i tok.

# Gavman givim giaman mani ripot: Kua

SEDO Atoni Jeneral na Memba bilong Sinasina Yonngomugl, Kerenga Kua i tok Gavman i tokaut long ol giaman mani ripot.

Em i tok ol ripot Deputi Praim Minista na Minista bilong Tresari, Charles Abel i givim i no tru.

Em i mekim dispela tok bihain long Abel i tokaut long Fainel Baset Autkam (FBO) ripot 2018 i no longtaim i go pinis.

Em i tok hevi bilong mani i stap yet, mani i sot, kes flo na inflesen na Gavman i lukluk we na i wok long tok ikonomi i kamap gut.

Em i tok bisnis i no

kamap gut we planti manmeri i no gat wok.

"Long mekim hevi i go bikpela, gavman i givim narapela bikpela hevi long katim pe bilong ol pablik sevan na ol tisa, ol lain husat i wok hat," Kua i tok.

"O'Neill na Abel i no ken giamanim yumi."

Em i tok ripot bilong Nesenel Statistikal Opis i soim olsem inflesen i go long 5 pesen.

Em i tok taim prais bilong ol guds na sevis i go antap, gavman i katim pe bilong ol pablik sevan long mak bilong 5 pesen. Dispela long em i ken

painim mani na inapim baset.

"Aninit long gavman bilong PNC (Pipels Nesenel Kongres), mak bilong dinau kantri i wok long kisim go antap moa long 50 pesen.

"Gavman aninit long Somare i lukim dinau mani bilong kantri i stap long K9 bilien tasol nau i go antap long K25 bilien. "Dispela i soim O'Neill i no save long menesim kantri."

Em i tok Abel long FBO ripot i no tokaut tru long baset difisit em kantri i gat long em long K100 milien.

## For surplus funds

Minimum deposit of K5,000

## build your wealth

### TERM DEPOSIT

- Lock away excess funds
- Protect your savings from impulsive spending
- Earn interest and reinvest

WE ARE BSP

☎ 3201212 / 7030 1212 - 24/7

✉ servicebsp@bsp.com.pg

www.bsp.com.pg

# Is Sepik tokaut long provinsal plan

**Jonathan Poema i raitim**

**IS Sepik provinsal gavman i opim provinsal plen bilong yia 2018 – 2028, long Trinde, las wik.**

Het tok bilong dispela plen em 'Empowering People to secure a sustainable future for a greater Sepik'. Em i tok 'Strongim ol manmeri long kamapim gutpela bihain taim bilong ol Sepik'.

Gavana Allan Bird i tok, em plen bilong wok kamap long slip na sindaun bilong ol pipel.

"Dispela plen bai stap olsem rot bilong putim mani na skruim wok long kamap."

Em i tok, bikipela salens nau em rot edministresen bai bihainim na kamapim wok.

Mista Bird i tok, "Mipela pipel bilong Is Sepik bai trastim yupela ol pablik sevan, mipela laikim yupela i gat gutpela pasin, mekim gut wok, wokim olgeta wok long stretpela pasin na givim gutpela sevis long ol pipel. "Givim sevis we ol pipel i laikim yupela long givim. Yumi i mas kamapim gutpela wok

long olgeta sekta bilong long inapim olgeta wok i stap long plen bilong provins," Mista Bird i tok.

Long wankain taim, Is Sepik Provinsal Edministreta, Dokta Clement Malau i tok, "Edministresen i redi long karim dispela salens na kamapim wok. Em i tokim olgeta sekta long han bilong kamapim wok long distrik edministresen long sanap wantaim na bihainim dispela plen long kamapim wok.

Dokta Malau i tok, dispela plen bai i no ken stap nating na das i karamapim olsem ol

narapela long olpela edministresen bipo, tasol olgeta i mas bihainim long kamapim wok. Em i singaut long olgeta pablik sevan long wok bung wantaim olgeta ol dona ejensi na ol narapela patna long developmen.

**Angoram MP, Salio Waipo na Gavana Allan Bird i holim tupela provinsal plen na sanap na Gren Sif, Sir Michael Somare i katim ribon.**

*Poto: Jonathan Poema*



## Lazarus lusim Ginigoada long LLG ileksen

**Benorah C Hesehing i raitim**

LAZARUS Kairi bilong Baimuru long Galp provins i lusim Ginigoada Foundation bihain long 6-pela yia em i raun long ol setelmen long Nesenel Kapital Distrik na givim helt na sefti treading aninit long Faundesen.

Em i tokim *Wantok Niuspepa* olsem em i

mekim dispela tingting bikos em i laik helpim ol pipel long wod bilong em we i no save lukim hanmak bilong gavman maski gas projek i sindaun antap long graun bilong ol.

"Wod bilong mi na ol arapela komyuniti long distrik i save bungim bikipela hevi long kisim gutpela wara,edukesen, lo na oda, rot na ol ara-

pela sevis. "Namba wan samting tru, no gat gutpela edukesen sevis long distrik na planti sumatin i lusim skul.

"Namba bilong ol pikinini i stap gut long skul na pinisim skul i pundaun tru. I no olsem bipo mipela planti i kisim edukesen," em i tok.

Em i tok tu olsem ol i no kisim wanpela luk-

save long LNG projek. Gavman i bin givim wanpela 1000 lita wara tenk long komyuniti bilong em, sampela yia i go pinis na i no gat arapela luksave antap long dispela inap nau.

Mista Kairi i tok ol pipel long ples i krai na strongim em long resis long wod kaunsila sia na bihain traim presiden sia long gutpela bilong ol

pipel. Mista Kairi bai sanap long LLG ileksen long skruim edukesen sevis, gutpela wara saplai na ol arapela sevis long komyuniti na distrik.

Em i tok long ol wok bilong, em i kamapim gutpela poroman wantaim ol ogenaisesen em inap long wokbung wantaim long bringim sevis long ol pipel bilong em.

## Bipo Madang primia askim pipel long votim gutpela lida

**James G. Kila i raitim**

PASTAIM primia bilong Madang na wanpela strongpela politikal lida long provins, Andrew Ariako i askim ol pipel bilong Madang long tingting gut na votim ol lokal level gavman kaunsil memba.

Dispela ileksen i mas kamap long las wik tasol Suprim Kot i pasim.

Mista Ariako husat i wanpela man i save tok tru na i gat rispek long komyuniti na sosaiti i tokaut long Redio Madang olsem votim gutpela man i bikipela samting long helpim sindaun bilong ol.

Em i tok ol i no ken votim ol lain husat igat rekot nogut.

Em i tok LLG ileksen em wanpela bikipela ileksen long makim ol LLG presiden na wot memba, na dispela ol lain bai stap klostu wantaim ol pipel na harim hevi na krai bilong ol.

Em i tok ol kaunsil bai bringim hevi bilong ol i go long provinsal asembli.

Mista Ariako i tok long



Andrew Ariako, bipo Madang primia.

pastaim ol lida ol pipel i makim i save sanap strong tru long makim laik bilong ol pipel.

Tude dispela kain ol lida i no moa stap long Madang politiks.

Em las primia bilong Madang aninit long olpela provinsal gavman sistem.

Bihain long 1995 rifom o senis i bin kamap gavana i go pas long lukautim provins.

## Provinsal plen go gut wantaim Nesenel plen

**Jonathan Poema i raitim**

PROVINSAL Edministreta bilong Is Sepik, Dokta Clement Malau i tokaut olsem opis bilong Nesenel Plening i givim klia luksave olsem Is Sepik provinsal plen i go gut wantaim Nesenel Plen bilong bungim visen 2050.

Dokta Clement Malau i tok tenkyu long Is Sepik provinsal gavman na olgeta senia wokman na meri long gavman opis na ol ejensi long provins long wok bung long kamapim dispela plen.

Em i tok tenkyu tu long Profesa Misty Baloiloi, long bikipela helpim em i givim, ol Yuropien Yunien (EU) long stap klostu long



Dokta Clement Malau i tok tok long taim bilong opim provinsal developmen plen.

*Poto: Jonathan Poema*

wok wantaim provinsal gavman, Ekting Seketeri bilong Nesenel plening, Korney Samuel, long salim tupela opisa i go wok wantaim provinsal

gavman. Em i tok amamas tu long Gren Sif, Sir Michael Somare long stap na katim ribon long opim volum 1 na 2 bilong ESP

provinsal dvelopmen plen bilong yia 2018-2028.

Dokta Malau i tok dispela i namba wan plen long kantri long kisim luksave bilong Nesenel plen

aninit long opis bilong nesenel plening, bihainim bung i kamap long mun Me2018, long Maprik Distrik.

"Dispela bung bilong kisim tingting bilong ol distrik i kamapim gutpela infomesin long wokim dispela plen. Olgeta distrik i bung long givim tingting, na nau bai yumi bungim olgeta distrik long givim sevis long olgeta," Dokta Malau i tok.

Long wankain taim, Gren Sif, Sir Michael i tok amamas long ol lida long provins na holim bung na kisim tingting bilong olgeta distrik na putim long p l e n . "Gavana, em bikipela wok nau long solda bilong yu na edministresen bilong yu," em i tok.

**MAKES YOUR PIGS AND CHICKENS GROW FASTER**

**IMPROVED FORMULA for faster growth**

**Flame STOCK FEED**

**PIG GROWER**

**BROILER STARTER**

**Flame STOCK FEED**

goodman fielder

# Is Sepik gat nupela Polis Komanda

**Jonathan Poema i raitim**

PLANTI man na meri long Is Sepik i bin kamap long lukim na harim toktok bilong nupela Provinsal Polis Komanda (PPC) bilong Is Sepik, Albert Perli.

Em i tok, "Mi olsem wanpela Sepik, mi laikim yumi olgeta i mas wok bung wantaim olgeta sekta long daunim ol hevi bilong lo na oda long Wewak taun na provins wantaim. Em i tok, em i bin wokim wankain wok long

Hailans pastaim long em i kisim wok long Wewak. Wok em i no nupela wok, tasol em i save gat strongpela tingting olsem wokbung tasol inap long kamapim gutpela wok long olgeta sosaïti na sekta long laip. PPC Perli i tokaut

olsem em bai stap olsem nupela Polis Komanda long Is Sepik, Sif Saiden Hasimani bai stap olsem Polis Stesin Komanda (PSC) bilong Viala polis stesen, In-spekta James Baugen em Rurel Komanda na Saiden Paul Sim bai

lukautim Komyuniti Polis. Bihain long dispela bung, ol polis i kalap long kar na raun long Wewak taun, long soim wok bilong ol long kamapim seif komyuniti. Sif Saiden John Hasimani i tok, "Nupela PPC

em man long yumi Sepik yet, na em kam long wok wantaim yumi, na yumi olgeta ol PSC long ol polis stesin long provins mas wok bung wantaim em na ranim lo na oda long provins." Mista Hasimani i tok tenkyu long Polis

Komisina, Gary Baki na hetkwata long wokim dispela tingting na tok aut long nupela polis komanda long provins bihain long dispela wok i stap nating na ol opisa i wok long wok ekting tasol long dispela wok longpela taim.

## Meri ministri lukim ol kalabus long Ista



Wanpela meri long yut ministri bilong sios i sindaun wantaim ol kalabus man .Foto: Jonathan Poema

**Jonathan Poema i raitim**

WANPELA meri lotu grup bilong Assemblies Of God (AOG) sios long Wewak, i mekim wanpela Ista raun i go long Boram Haus kalabus long skelim tok bilong God na strongim ol kalabus lain long Sarere 20 Epril 2019. Meri i go pas, Angela

Junamberi, na Pasto Meri, Maria Mufian i tok olsem ol sevan bilong Papa God, ol i save tingim ol man i stap long kalabus na haus sik long prea bilong ol bai Papa God i ken mekim ol orait gen long sik na bikhet pasin bilong ol. Angela i skelim baibel stori bilong meri Samaria long John sapta 4 na i tok;lotu lo i

bruk, ples bilong lotu em pinis. "Yu mas lotuim Papa God long wanem kain ples yu stap long en. Haus kalabus, haus sik em ol ples bilong lotuim Papa God bai yu inap banisim yu yet long pundaun long pasin sin." Long wankain taim Pasta Maria i tok, "No gat man em sin long ai bilong Papa God taim

em tok sori long man na God long ol nogut pasin em i mekim pinis. Ol kalabus man i tok tenkyu long ol meri lotu grup long lukim ol long taim bilong Ista na skelim tok bilong buk baibel wantaim ol na ol i amamas olsem maski i no gat famili i tingim ol long kain bikpela taim olsem, Papa God i stap wantaim ol.

## Parkop tok lukaut long buai sela

NESENEL Kapital Distrik Gavana, Powes Parkop i gat tingting long pasim ol manmeri long no ken salim buai gen long siti. Em i no amamas long pasin ol manmeri i mekim long tromoi skin na spet buai long pablik ples. Em i mekim dispela tok long dispela wik long taim Nesenel Kapital Distrik i lonsim Klinim Siti

program. Em i tok pasin bilong tromoi pipia na spet buai na bagarapim i no gutpela. Em i tok sapos ol manmeri i no save long lukautim pablik ples, dispela i soim ol i no save long lukautim famili na haus bilong ol. "Buai i gutpela samtiring long ol manmeri long

ol i mekim mani, ol lain husat i kaikai bai i pilim gut na amamas," Parkop i tok. "Tasol sapos ol i no save long lukautim famili, haus na ol pablik ples, olsem wanem ol bai inap lukautim komyuniti na kantri. "Stap bilong ples i soim yumi i wanem kain ol lain."

Em i tok olsem long tingim kain tingting manmeri bilong narapela kantri i gat long PNG taim ol i kam. Parkop i tok pasin ol manmeri i salim o baim buai, kaikai na spet i soim ol i no gat rispek long ol arapela manmeri na pablik ples. Em i tok sapos yumi lukluk long ai bilong ol

## Ol yut wokim awenes long drag na spak wara



Ol yut i karim laplap ol i raitim tok bilong daunim vailens na wokabaut. Foto: Jonathan Poema

**Jonathan Poema i raitim**

OL yut bilong ol Katolik sios long Wewak distrik, Is Sepik provins i kamapim wanpela grup na wokabaut raun long Wewak taun, na toktok long ol wan lain bilong ol long no ken kisim ol spak wara na drag na kamapim vailens long komyuniti. Ol i toktok strong long kamapim gutpela komyuniti i sanap antap long gutpela pasin tumbuna, bel isi na laikim wanpela na narapela

long kamapim gutpela ples we olgeta Sepik na ol arapela visita i ken amamas long stap na raun. Pater Calistus Manseh i tok, "Taun bai senis, taim yumi man, meri na pikinini i senisim ol pasin bilong yumi." Em i tok, em bai i hat long senis taim yumi holim yet ol pasin bilong kisim spak wara na drak, na ol narapela ol samtiring bilong bagarapim komyuniti. "Pawa bilong tok orait o nogat tu em i stap long han bilong yumi

yet, taim yumi tok no em no ,yes em yes." Fr Calistus i tok tu olsem nau em taim bilong ol yangpela long kirap na mekim samtiring long helpim na stretim sindaun long komyuniti, na i no sindaun na wet o harim tasol i stap. "Taim yumi stap nating, hombru na mariwana bai bagarapim komyuniti sindaun bilong olgeta famili. Dispela em i no gutpela tumas, wanpela i mas kirap na mekim sampela samtiring long stopim kain hevi long kamap bikpela."




# PHONES AGAINST CORRUPTION

Combating corruption is everyone's business

Report corruption by texting Digicel# **16321**

Do not let corruption stop the development of Papua New Guinea



Say "NO" to Corruption!

**Text 16321**

- > Simple
- > Free SMS
- > Anonymous



An initiative of GoPNG and UNDP supported by the UNDP-Australian Government Asia Pacific partnership on Anti-Corruption for Peaceful and Inclusive Societies.

Department of Finance  
Internal Audit & Compliance Division  
Phone: 79986000 Extension: 8206  
www.phonesagainstcorruption.org

# Sir Julius lukluk raun long ol ailan long Nu Ailan provins

Gavana bilong Nu Alan, Sir Julius Chan wantaim ol teknikel opisa, lida bilong Gvman Bisnis, Demas Kavavu na provinsal woks manesa, Solomon Pela wantaim ol lain i makim rot kontrakta, PNG SJC, i pinisim wanela lukluk raun bilong ol i go long ol ailan insait long Provins.

Ol i bin raun tupela de long lukluklong ol rot na putim ol sola strit lait long Nu Hanova, Mussau, Emirau na TENCH Ailan.

Dispela lukluk raun bilong ol i bin stat long Sande 28 Epril long Ungat, Nu Hanova we Sir Julius i bin lukluk long Unity rot we ol wok ol i bin stat long Ogas las yia. Ol i pinisim wok long 25km pinis na i gat narapela 25km i stap yet long pinisim.

"Mi save i gat bikipela salens long wok long dispela hap, tasol mipela i bin wokim komitmen long ol pipel na mipela i mas pinisim ol wok aninit long agri-men," Sir Julius i tok.

Long Nu Hanova, o i bin stop long Enelava, olpela lepra haus sik bipo, na nau em i ples we Enelava Vokesenel na Teknikel skul i sanap. Ol i putim foapela sola lait long dispela skul.

Sir Julius i mekim komitmen tu long fiksime infrastraksa bilong skul. Namba wan wok em long wokim hul wara bilong skuk ba stretim haus bilong ol studen i sindaun na kaikai.

Sir Julius i tok dispela skul bai kamap ples bilong givim trening long ol lain i laik kisim save long hospitaliti industri long Nu Ailan.

Em i wokim komitmen tu long eria bilong musik, moa yet klasikel musik.

"Mi laik lukim ol studen i pilia ol musik instramen olsem vaiolin, trombon na klarinet," em i tok.

Ol i lusim Nu Hanova na ran long bot bilong gavman, MV Autonomy i go long Mussau long Murat Lokal Level Gavman eria. Ol i kamap long Boliu wof long 6 klok apinun.



Rot bung long Lavongai, Nu Hanova Unity Rot.



I Sir Julius i opim sola strit lait long Rongoe Praimeri Skul long Emirau, Murat LLG.



Man i makim Komyuniti Yut Linson Aaron, Presiden bilong Murat LLG, Edwin Maingen na ol arapela komyuniti

lida i wet i stap long tok welkam long Sir Julius na lain bilong em. Long LLG, Edwin Maingen na lukluk raun long Mussau

Trench Ailan rot we planti wok i mas kamap yet long en. Sir Julius i tokim ol lain bilong PNGSJ olsem em i no

amamas long wok i slo tumas na ol i mas hariap long mekim wok. Sir Julius i toktok long ol studen bilong Boliu

Haikul na i opim 4-pela sola strit lait long skul. Ol studen na tisa i amamas na tok tenkyu long gavman bilong Sir

Julius. Ol i tok dispela lait bai givim bikipela helpim tru long skul na ol studen husat i slip long skul i ken stadi long nait.

Bihain long Boliu, ol i go long Rongoe Praimeri Skul long Emirau Ailan. Ol studen i amamas long SIRR Julius na ol i karim em long bet. Sir Julius i tok tenkyu na givim luksave long ol papamama, ol tisa na ol studen. Em i tok ol i stap longwe tru tasol ol i gat bikipela rispek long gavman bilong em na dispela hap tok bilong em "Maski yu stap longwe, mipela i tingim yu tu"

Sir Julius i givim tupela sola strit lait long skul na i wokim komitmen bilong fiksime wanela klasrum em kost bilong en K 50,000, na i givim tu 4-pela baisikel, na tupela wilbaro long skul. Em i promis long baim wanela nupela trak bilong skul bihain long Murat Presiden na ol wod memba i mekim kontribusen bilong ol.

Las raun bilong Sir Julius i bin go long naispela TENCH Ailan samt-ing olsem wan na hap aua longwe long Emirau. I gat planti ol pisin tru i save stap long dispela ailan na ol lain husat i save laikim netsa bai amamas long raun long dispela ailan.

Ol pipel bilong ailan i givim welkam bilong bikman long Sir Julius. Populesen bilong dispela ailan em 70 man, meri na pikinini. Ol i putim 3-pela sola strit lait long ailan na Sir Julius i mekim komitmen long stretim etpos bilong ailan na telekomyunikesen netwok bilong ol.

Sir Julius i tokim provinsaal iekonomik divisen long helpim ol pipel na painim maket bilong salim pis bilong ol.

Sir Julius i tok em i amamas long dispela tupela de raun bilong em bikos em i kamapim planti samtig. Em i salensim ol dairekta na sif eksekutiv opis long painim ol wei bilong helpim laip bilong ol pipel husat i stap long ol longwe ailan.

# Tripela kantri wokbung kamap gutpela long malaria projek

**AUSTRALIA, Saina na Papua Niugini i wokbung yet long kamapim ol nupela helt program.**

Ol mausman bilong Australia, Saina na Papua Niugini gavman i bin bung i no longtaim i go pinis long toktok moa long dispela wok bung long pait bilong daunim sik malaria na arapela helt sekyuriti.

I bin gat luksave long wok bung bilong Australia-Saina-PNG Paillet Kopresen long wok bilong Malaria Kontrol insait long Papua Niugini, insait long dispela miting we i lukluk long wanem kain wei bai tripela kantri wok bung long strongim yet helt insait long PNG.

Ol lain i bin stap long dispela miting em: Ol opisa bilong PNG Dipatmen bilong Foren Afes na Treid, PNG Nesenel Dipatmen bilong Helt, PNG Dipatmen bilong Nesenel Plening na Monitoring, PNG Institut bilong Medikal Risets, PNG Sentral Pablik Helt Laboratori, PNG Skul ov Medisin na Helt Sains, Saina Nesenel Helt Komisnin, Saina Ministri bilong Komes, Saina Nesenel Institut bilong Parasait Disis na tu ol opisa bilong Australia Hai Komisnin long Pot Mosbi.

Australia Hai Komisina Kaunsel, Will Robinson i bin makim Australia long dispela miting na em i tok em i wanbel long ol wok kamap long testim malaria na ol wok painim i kamap pinis long stat bilong dispela projek tripela yia i go pinis i kam inap nau.

"Dispela rot we i bin stat long 2016 i gat kaikai bilong en. Wanpela lukluk bek we i bin kamap long 2018 i bin soim olsem dispela projek i wok gut long mekim ol wok painim bilong sik malaria long Papua Niugini. Wantaim dispela wok kamap ol i bin trenim tu 300 helt wok-

man na wokmeri, ol klinisen, ol lain bilong wokim risets na ol sain-tis," Robinson i tok.

Deputi Seketeri Polisi long PNG Dipatmen ov Foren Afes, Joseph Varo, tu i tokaut olsem wok bilong malaria projek em i kamap gut wantaim nupela wei bilong tripela kantri developmen kopresen o wokbung.

"Wantaim wokbung na sapot bilong tripela kantri inap long strongim ol wok bilong yumi long inapim tingting bilong ol global Sastenebel Developmen Gol. Dispela paillet projek i lukluk long wanpela bikpela sekta we i save gat planti hevi long en, olsem na em dispela kain wokbung em em i wanpela gutpela wei bilong wok," Mista Varo i tok.

Long wankain taim, Nie Jiangang, Deputi Dairekta Jeneral bilong Dipatmen ov Intenesenel Kopresen bilong Pipels Ripablik ov Saina Helt Komisnin i tok wei bilong tripela kantri wok bung i mas go het long yusim save na ekspiriens bilong wan wan kantri long helpim PNG. "Dispela wok bung i mas lukluk long ol hevi bilong PNG helt sistem na skelim wantaim gutpela sistem bilong narapela patna kantri. Yumi mas kamapim nupela wei na yusim ol save na ekspiriens bilong olgeta ol patna long projek bai lainim long narapela. Olsem long sampela wei bai yumi kamap ol tisa, na long sampela wei bai olsem ol sumatin," Mista Nie Jiangang i tok. Australia-Saina-Papua Niugini Paillet Kopresen long wok bilong Malaria Kontrol Projek i bin stat long Januery 2016 long sapotim PNG Nesenel Malaria Stratejik Plening long kamapim gut wei bilong sekim na painimaut malaria binatang na long traime wok namel long tripela kantri bai go olsem wanem.



Ol lain i bin stap long miting long Pot Mosbi long 1 Epril.

# DOUBLE DATA

Baim wanpela bmobile data plan tete, na kisim **DOUBLE DATA FREE!**

...inap long **15GBs** lo **FREE** bonus data!

Hariap, displa double data ofa bai stap inap long liklik taim tasol!

76005555/1555 or for 4GLTE call 1500  
 connect@bmobile.com.pg  
 facebook.com/Bmobile4GLTE  
 www.bmobile.com.pg

# Click TV bai kamap patna bilong MPIIP

Jacklyn Kimala i raitim

MIS Pasifik Ailan Pageant (MPIIP) i bin tokaut long pantnasip bilong PNG Midia Klik TV husat i bin kam long bod long mekim gutpela pablisiti bilong MPIIP long las wik Tunde long Pot Mosbi.

Mis PNG na Mis Pasifik Ailan Leoshina Kariah i bin amamas long tokaut long dispela media oge-naisesen Click 'TV' i kamap midia patna wantaim MPIIP PNG Pageant.

"Dispela oge-naisesen bai givim gutpela pablisiti na mipela amamas olsem Click TV bai mekim laip telekast long taim bilong kraun nait bilong Mis PNG long Sarere Ogas 31, 2019," Mis PNG Leoshina Kariah i tok.

Em tok namba wan samting we Click TV bai soim laip telecast em long krawn nait bilong Mis PNG na Mis Pasifik Ailan bilong olgeta Pasifik rijon.



Mis PNG na Mis Pasifik Ailan Leoshina Kariah

"Dispela i ken givim ol sans long soim stail bilong bilong olgeta rijon wantaim kain kain kalsa, gutpela pipel bilong mipela na naispela kantri bilong mipela PNG," Mis Kariah i tok.

Em i tok dispela spon-sasip wantaim Click TV bai wok bung wantaim ol arapela midia senta long taim, bilong rijonal Pageant bai kamap long Novemba.

"Dispela em long tok tenkyu long olgeta midia husat ol i bin sapotim ol long las yia na tenkyu Click TV na welkam long MPIIP famili," em i tok.



(L-R) Molly O'Rourke Sia Ledi Mis PNG MPIIP, Mis PNG na Mis Pasifik Ailan Leoshina Kariah na Click TV Jeneral Menesa Radrodru Tabualevu i bin holim agrimen patnasip pepa long las wik Tunde. (Poto Jacklyn Kimala)

# Patnasip long bringim Nesanel Sitisen Program

TRANSPARENSI Intene-senel PNG (TIPNG), em i skruim wok bilong em go het klostu wantaim ol gavman ejensi na eduke-sen institusen long mekim ol pipel i mas save long rait na wok bilong ol olsem sistisen.

Dispela lokal anti-ko-rapsen Non-Gavman Ogenaisesen (NGO) i bin sainim nupela Memorandum ov Undastanding (MoU) wantaim ol Nesanel Dipatmen bilong Edukesen (NDoE) long go het long kamapim moa plen bilong pablik edukesen risos ol i bin developim wantaim long 2014. Dispela patnasip i

gat bikpela tingting long givim skul long ol yang-pela long kamap ektiv sitisen.

Wok wantaim NDoE em wanpela plen bilong TIPNG long developim ol pablik edukesen wok olsem;

\*Civic Edukesen Tisa Risos Buk bilong Gret 3-12 wantaim 300+ moa ekksesais;

\*Bekgraun Rit/Infome-sen Buk bilong ol tisa;

\*Sumatin rita wantaim sotpela stori we tok klia long ol bikpela tingting

\*40-pela wei bilong ol tisa long yusim taim ol i lainim sumatin

\*Bikpela Buk bai gat

traipela piksa bilong dro bilong tisa long ritim long ol sumatin

\*DVD bilong Civic Edukesen Video na Presentesen na eksampel

\*Masin aplikesen wantaim etikol lo

As tingting bilong ol MoU em i no bilong sainim nupela agrimen wantaim NDoE na TIPNG, tasol em bilong kamapim nupela plen bilong dispela rilesensip bilong tupela agrimen long strongim ol yangpela populesen. Dispela patnasip draivim fowot wok. TIPNG i bin putim dispela long developim sivik edukesen program na

bai bringim gutpela samting insait long PNG.

Las yia, TIPNG i bin holim Skul Bes Sivik Edukesen (SBCE) tisa trening woksop bilong ol tisa insait long NCD, Sentral, Westen Hailens, Is Sepik, na Isten Hailens Provins. Dispela woksop i bin tingting long helpim tisa long tokaut moa long yusim SBCE samting long wan wan klasrum program long bungim wantaim tisa risos wantaim sosel sains na pesonel developmen program long developim plen.

TIPNG i bin wok long mekim ol SBCE program

em bung wantaim ol Sitisen na Kristen Value Edukesen Framwok. Dispela Program bai go het long Bod bilong Stadis long mun bihain long kisim tok orait insait long Nesanel Program. Dispela SBCE projek bai wok long patna wantaim ol Program Divisen long trenim ol tisa long yusim dispela tingting bilong Sivik Edukesen na bihain ol i ken putim kala na serim long olgeta hap bilong kantri. Dispela MoU i soim gutpela rilesensip wantaim ol long strongim Gutpel Sitisen insait long Papua Niugini.



Seketeri bilong ol NDoE. Dr Uke Kombra i bin sainim MoU taim TIPNG Siaman Mista Lawrence Stephens na arapela ol lain makim Ombudsman Komisnin, ol NDoF, The Voice Inc. Dipatmen bilong Australia na Foren Affairs na Tred (DFAT) na Buk Bilong Pikinini i bin lukim.



## 2019 Sir Anthony Siaguru Walk Against Corruption

Theme: "Justice = Enforcement + Reporting"

PORT MORESBY SUNDAY 09TH JUNE 2019 GAM - 9AM  
OTHER CENTERS: LAE GOROKA  
Corporate team of 12 - K2,000  
Civil Society & Church team of 10 - K200  
School team of 10 students and 2 teachers - K200  
Family team of 10 - K100

Prizes will be awarded to the best dressed team and the team with the most creative anti-corruption message



Register a team today!

call: 323 4917 / 7517 email: info@transparencypng.org.pg location: Lokua Avenue Section 54 Lot 31, Boroko NCD



# Solwara i daunim namba tri rot nau long Makasili



stori na ol poto: Anna Solomon

Ol pikinini bilong Makasili.



Solwara i bagarapim tru dispela rot long Makasili i go long Galilo na ol arapela viles.



Rot arere long Makasili i bruk i go daun.

**PLES Makasili i stap long Hoskins, samting olsem 1 na hap aua ausait long Kimbe taun long Wes Nu Briten provins. Dispela ples i stap arere long nambis na tude ol pipel i pilim bikpela hevi tru long solwara i katim rot bilong ol. Na ol i luksave tu long ol bagarap klaimet senis i ken kamapim.**

Solwara na tait wara bilong ren i kam daun long maunten i wok long bagarapim rot bilong ol i kam inap tude we namba tri rot arere long ples i bagarap pinis na ol i yusim namba foa rot nau we ol strongpela kar olsem ol foa wil draiv kar i ken ran gut long en. Long sampela hap graun i bruk klostu tumas long rot na i no longtaim bai i no seif tumas long ol hevi kar i yusim dispela rot.

Ol nius ripota husat i bin go stap long wanpela

woksop long Kimbe em opis bilong Climate Change Development Authority (CCDA) wantaim Yunaitet Nesens Di-velomen Program (UNDP) na wanpela de ol i raun i go olsem long Makasili, Vavua na Pokili Wail Laip Menesmen eria.

Long taim mipela i kamap long ples Makasili, ol pipel bilong ples na komiti wantaim tisa bilong elementeri skul i bin stap long toktok wantaim mipela. Ol i soim bikpela bagarap long rot bilong ol. Elementeri skul tisa, Tito Wesley i tok mun Desember em i taim bilong bikpela win na ren, na moa graun i save bruk i go daun. Tude, nambis bilong ol i stap daunbilu tru na i no isi long go daun long ples we ol i save putim ol kanu.

Lawrence Lama, i tok, "Sampela taim mipela i mas holim rop na go daun long nambis."

Elementeri skul tu long ples i kisim taim. Long taim bilong ren, wara i save go insait olsem na nau ol i wokim ol nupela klasrum i sanap long pos na i gat wara tenk tu bilong kisim klinpela wara bilong dring.

Ol mama i tok ol i save wokabaut longwe long painim klinpela wara bikos solwara i bagarapim ol hulwara arere long nambis long ples.

Ol pipel bilong ples i planim welpam na groim kaikai long gaden. Tasol ol i tok bikos rot i bagarap, ol bikpela kar bilong New Britain Palm Oil (NBPO) i no inap kam arere long ples long kisim welpam bilong ol.

Ol pipel i askim mipela long tok save long provin- sal gavman long helpim ol long stretim dispela rot bilong ol.

Provinsal edministreta Williamson Hosea i bin toktok wantaim ol ripota

bihain long dispela lukluk raun na em i bekim sam- pela askim long dispela Hoskins-Koimomo rot.

Mista Hosea i tok provinsal gavman i luksave long dispela hevi tasol em i wanpela bikpela salens tru na i mas gat bikpela ensinia wok i kamap long stretim dispela rot. Em i tok tu olsem provinsal gavman i putim samting olsem K3milien bilong stretim ol rot na bai ol i yusim sampela bilong dispela long stretim dispela rot long seksen bilong Makasili. Tasol Mista Hosea i tok tu olsem ol pipel i mas tingting long bihain taim bilong ol tu na muvim rot i go insait moa we i longwe long nambis.

**Neks wik: Pasin West – Lukluk raun long Pokili Wail Laip Menesmen eria.**

# REDD+ em i wanem samting



Ol ripota i go lukluk raun long Pokili Wail Laip Menesmen eria. Dispela bus i gat ol wailpaul na ol hot spring i stap long en.

LONG mun Epril, opis bilong Climate Change Development Authority (CCDA) wantaim Yunaitet Nesens Development Program (UNDP) i bin holim wanpela trening woksop bilong ol nius ripota long Kimbe, Wes Nu Briten provins.

As bilong dispela woksop em long skulim ol ripota long luksave long REDD+ na raitim ol stori bilong REDD+ na olsem wanem em i tasim laip bilong ol pipel bilong PNG na long ol arapela kantri long wol tu.

Sapos ol ripota i klia long REDD+ program bilong nesenel gavman, bai ol i ken raitim ol stori bilong skulim ol pipel long watpo REDD + em i impoten, na wanem samting Papua Niugini i mekim nau long strongim dispela impoten program bilong gavman.

Insait long dispela wan wik trening, ol ripota i bin gat sans tu long go lukim tripela ples ausait long Hoskins we ol pipel i pilim bagarap bilong klaimet

senis, na wanem samting wanpela lain ples i mekim long lukautim gut bus na ol diwai na ol wail paul pisin i stap long Pokili Wail Laip Menesmen eria. Em eria tu em i wanpela ples tambu bilong ol.

Bikpela wok bilong REDD+ em long helpim ol kantri i wok long di-velop yet, long lukautim gut ol fores o bus bilong ol, wankain olsem ol arapela kantri long wol tu i mekim, long stopim klaimet senis, aninit long Yunaitet Nesens Fremwok Konvensen long Klaimet Senis (UNFCCC).

Gavman bilong Papua Niugini i mekim ol wok bilong REDD+ olsem kontribusen bilong en long stopim klaimet senis aninit long Paris Agrimen. REDD+ bai helpim Papua Niugini long winim driman bilong en long kamapim developmen, tasol long wankain taim tu, bai i no inap long bagarapim envairomen bilong en.

REDD+ i no stopim

ikonmik developmen, nogat. Em i bilong kamapim na strongim ol nesenel polisi long sloim daun kabon emisin long taim yumi rausim ol diwai long bus o kampim ol bagarap long bus, tasol long wankain taim tu, em i sapotim developmen i kamap long kantri.

Wanem mining o as bilong dispela hap tok REDD+?

REDD+ em ol wok bilong Redusim Emisin long Diforestesen na Fores Degridesen na dispela mak (+) i toktok long konsevim fores long kabon stok, sastenabel menesmen bilong fores na strongim ol fores kabon stok (REDD+)

REDD+ i tok save long yumi no ken bagarapim nabaut ol bus na diwai bilong yumi. Yumi mas mekim ol wok bilong lukautim gut bus na planim bek ol diwai long kisim ples bilong ol dispela yumi katim, Sapos yumi mekim olsem bai graun i no inap sot long ol diwai na kabon stok.



# Haus Pasto nidim moa mani long pinisim wok

**Benny Geteng i raitim**

**APO Peris bilong Lauulu Seket bilong Evanjelikal Luteran Sios long Morobe provins i nidim moa mani long pinisim haus bilong pasto bilong ol pastaim long dispela yia i pinis.**

Dispela hap i nidim wanpela pasto tasol sios i no inap long salim wanpela pasto sapos i no gat haus long em i go stap.

Apo Paris Yut Presiden, Paul Awasa i tok wok bilong sanapim haus bilong pasto i bin stat long mun Oktoba 2018 na ol i bin makim oslem K15,000 long pinisim wok. Em i tok insait long 25 yia nau peris i no bin gat wanpela pasto bilong ol bikos i no gat gutpela haus, olsem na ol bilip man na meri i no bin kisim gut sevis bi-

long lotu longpela taim.

"Mipela kisim sampela mani pinis long tok tenkyu ofa i kam long ol memba," em i tok.

Em i tok olsem ol boi, yangpela man long asples i bin wokim dispela haus nating stat long 2018 yet.

"Mi laik askim ol bisnis haus na ol pikinini bilong peris insait long kantri long painim inap mani long helpim pinisim dispela haus pasto long dispela yia," Mista Awasa i tok.

Olgeta tupela mun ol i save kisim wanpela tok tenkyu ofa long pinisim dispela haus tasol em i no inap yet long mekim wok.

Em i tok ol i nidim samt-ing olsem K5000 moa long baim ol timba, plai-wut na insait banis bilong haus.



Poto kepsen : Wanpela haus bilong pasto long Apo Viles. Em i nidim moa K5,000 long pinisim gut. Poto: Benny Geteng

## US Embesi bai sanap strong yet wantaim PNG



Catherine Ebert-Gray. Embeseda bilong US long Papua Niugini, Solomon Ailan na Vanuatu. Poto: US Embesi.

YUNAITET Stets (US) Embeseda long Papua Niugini, Solomon Ailan na Vanuatu, Catherine Ebert-Gray i tokaut long dispela wik long tingting bilong Amerika pipel long sanap strong yet wantaim ol pipel bilong dispela ol kantri long wok bilong ikonimi na sosel developmen long rijon.

Embeseda Ebert-Gray i tok, "Amerika olsem wanpela kantri bilong Pasifik, ol pipel bilong mipela i holim strong pasin bilong wok poroman wantiam ol pipel bilong ol Pasifik Ailan olsem Papua Niugini we planti tausen Amerika i stap yet na i lotu wantaim yupela insait long ol viles i stap insait tru long ol bus bilong ol dispela kantri.

"Mi amamas olsem pasin poroman bilong yumi em i sanap antap long tras o strongpela bilip, kliapela save na ol veliu yumi gat wantaim. Mipela i amamas long stap arere long wansolwara wantiam yupela na mipela i gat bikpela laik long wok wantaim yupela long kamapim strongpela Pasifik Ailan rijon we i redi long banisim em yet wantaim ol save we i stap insait yet long

PNG." "Mipela i laik lukim wanpela Indo-Pasifik rijon we i op long planti sans bilong ol pipel bilong en long treid investmen na long hap we ol pipel yet i ken toktok long developmen bilong ol komyuniti bilong ol.

Ol USAID klaimet program bilong mipela wankain tasol olsem ol kampani bilong US insait long PNG, wantaim lokal leba na lokal save bilong stretim sindaun na ol Papua Niugini mipela i wok wantaim i save olsem mipela i gat hai standet bilong mekim ol wok bilong mipela.

Dispela investmen bilong human kepesiti o save, na komyuniti developmen bai bringim gutpela samting bilong stap longpela taim bihain, gutpela bel isi bilong ol yet na PNG bai kamap moa strong na i no gat dinau long wanpela man.

Yunaitet Stet na ol narapela pren bilong PNG i stap strong long helpim long ikonimik na envairomen developmen we i gat rispek long kantri olsem wanpela independen kantri we i sanap antap long bilip na i save helpim stret ol pipel bilong en.



Bogenvil Kristen Sios Asosiesen (BCCA) eksekutiv memba i kisim poto bihain long miting bilong ol long Arawa long las mun.

Poto: Augustine Sarughu

## Wok bai gohet nau long nupela Kavieng maket

Wok bai gohet nau long nupela Kavieng maket bihain long provinsal gavman i stretim tok wantaim ol papagraun bilong Kavieng taun na Bagail eria we nupela maket bai sanap.

Wok i bin stop bihain long ol papagraun bilong Bagail i bin putim gorgor. Dispela pasin bilong putim gorgor em i mak tambu na i bilong stopim wok. Ol papagraun i bin tok ol i no bin kisim wanpela tok save long wok i kirap long sanapim nu-

pela maket olsem na ol i bin putim gorgor.

Long taim ol i bung, Provinsal Edministreta, Lamiller Pawut na teknikel tim bilong em i soim olsem dispela graun i bilong gavman na Provinsal Gavman i no brukim wanpela lo.

Pawut i tok klia long ol papagraun bilong Bagail wantaim lida bilong ol, Lamomo Tamekus, olsem graun we maket i sanap long en tude bai i gat sampela wok i kamap arere long nambis olsem

na ol i laik muvim maket i go long narapela hap.

Ol i wokim pinis disain bilong nupela maket na kontrak wok bilong sanapim maket em inap long mak bilong K2milien. Ol i ting olgeta wok bilong sanapim dispela maket bai pinis bihain long 6-pela mun.

Long soim ripek long ol papagraun, wanpela seremoni i kamap long rausim gorgor. Bikpela sif, Demas Kavuvu i go pas long dispela seremoni wantaim Mista

Pawut. Sif Tamekus i bin rausim dispela gorgor na i tokaut olsem bel isi i kamap nau na bai ol wok bilong sanapim maket i gohet.

"Mi laikim tru dispela graun na mi jeles olsem yu kisim dispela graun long mi tasol mipela i harim na luksave long watpo yupela i laik muvim maket olsem na plis, lukautim gut graun na tingim ol pipel bilong mi long wanem ol developmen i kamap," Sif Tamekus i askim.

Pawut i tok pasin bilong bihainim kastom na stretim dispela hevi i mekim tupela lain wantaim i stap bel isi na amamas.

Gavana Sir Julius i amamas long pasin bilong ol pipel bilong Nu Ailan long stretim hevi bilong ol na em i tok em i laik dispela projek i mas pinis hariap na bai ol i ken stretim gut olpela maket na ol pipel i ken yusim long malolo na kisim win.

# Refuji i tarangu bilong tude, pater tok

ISTA i taim bilong soim laik bilong Jisas Kraiss long ol narapela manmeri, Pater Ambrose Pereira, Seketari bilong Komyunikesen na Yut long opis bilong Katolik Bisop Konprens (CBC) bilong Papua Niugini na Solomon Ailan i tok.

Em i tok bikos yumi olsem Kristen, yumi i mas soim dispela bilip long pasin tru.

Em i mekim dispela tok long taim ol Sista bilong Santu Joseph bilong Cluny (SJC) i welkamim 10-pela refuji long konven bilong ol long Ista Mande.

Pater Ambrose husat i save lotu wantaim ol refuji i tok kain pasin ol sista i soim em ol arapela Kristen i mas mekim tu.

Sista Rachel Arputham, wanpela SJC, i save go lotu na pre tu wantaim ol refuji.

Ol refuji we i tok o i gat



SJC sista i mekim Ista bung wantaim refuji.

hevi wantaim gavman o i sik i save kam na stap long wanpela lodj long Mosbi.

"Piksa Pop Francis i mekim long go aut na bung wantaim ol trangu i save

strongim mipela," Pater Ambrose i tok.

"Mi save harim kraik na wari bilong ol refuji taim mi i go bungim ol.

"Ol i stap long hap em ol

i no plen o i gat tingting long stap.

Em i askim Gavman (Australia na Papua Niugini) long hariap na painim ples bilong ol refuji long

stap.

Hevi nau i stap long Gavman bilong Australia long mekim disisen.

Pater Ambrose i tok maigresen i no wanpela samt-ing we bai kam na go tasol i kain sindaun i kamap olgeta taim long ol arapela hap long wol tu.

"Stap bilong ol asailum sika long Manus husat i stap long ditensen senta moa long sikspela yia i mas tokim mipela long tok Pop Francis i mekim," em i tok.

Em i tok dispela singaut i bihainim rit i stap long Hibru (Hebrew) 11:13.

Em i tok dispela ol lain i stap longwe long famili na ples bilong ol na i wari na stap.

Bikos ol i bin stap longpela taim long senta olsem kalabus man, samela i sik na sampela i go longlong.

Em i tok pasin ol SJC sista i mekim i gutpela.



**Yut, Meri na Famili**

Pastor Barbara Lunge

## OL BIKPELA DUA BILONG GUTPELA NA NOGUT I OP

**T**AIM bilong God nau em taim bilong ol bikpela dua long op na gutpela pasin na pasin nogut bai ran wantaim. Klostu taim bai yu kism wanem samt-ing yu bin tingim longpela taim pinis long lewa bilong yu.

I gat tupela kingdom i wok long pait long las pait bilong tupela. Satan i stap hia long stilim, kilim na bagarapim na kism plant i go long hel paia. Tasol ol lain husat i putim bilip long God bai kism laip wantaim ol gutpela samt-ing i kam long God. Insait long Pot Mosbi toktok i raun olsem ol grup bilong satan nau i wok long raun long ol rot na pulim ol pikinini na ol meri husat i no gat strong long pait bek. Ol i wok long yusim ol kar i gat blakpela glas long mekim dispela pasin nogut bilong ol. Tasol PNG em i kavanen kantri o kantri i gat Tok Promis. Dispela em ol i wok long pait wantim God bilong Abraham, Isaac, Jacob, Israel na PNG. Ol bai kamap ples klia na bai go insait long kalabus.

Aisaia 59:19-21 'Bikpela bai i kam olsem bikpela wara i tait taim win bilong Bikpela i kirap na sakim wara na mekim wara i ran spit tru. Na ol manmeri long olgeta hap bilong graun, stat long hap sankamap na i go inap long hap san i go daun, ol bai i save na ol bai i pret long nem bilong en na ol bai i anit long en. Bikpela i tok olsem, "Mi God bilong sambai long yupela na helpim yupela, bai mi kam long Jerusalem na kism bek olgeta manmeri bilong lain bilong Jekop i lusim pinis pasin bilong mekim sin. Na bai mi mekim kontrak wantaim ol na tokim ol olsem, Spirit bilong mi bai i stap long yupela na maus bilong yupela i mekim olsem, na bihain ol pikinini bilong yupela na olgeta lain tumbuna pikinini bilong yupela, oltaim ol tu bai i autim tok bilong mi."

Ol lain husat i no tanim bel na kamap nupela insait long Spirit na pulap long pawa bilong Holi Spirit i stap long rot bilong birua na ol i mas traum tru long painim Bikpela na Tok tru bilong em. (Jon 3:3-7, 1:12-13, 14:6,3:116)

Aisaia 59:16-18 Na em i kirap nogut long lukim olsem i no gat man i stap bilong helpim ol man ol arapela i mekim nogut long ol. Olsem na long strong bilong em yet na long stretpela pasin bilong em yet, Bikpela i bin kism bek ol na mekim ol i stap gut. Em i bin pasim stretpela pasin olsem siot kapa i karamapim bros bilong en. Na em i bin putim strong bilong kism bek ol manmeri olsem hat kapa bilong pait. Em i bin pasim strong bilong mekim save long ol man nogut olsem klos bilong en. Na em i putim belhat bilong en olsem longpela saket. Na long belhat bilong en, em bai i mekim save long ol birua bilong en na bekim stret asua bilong ol sin bilong ol. Na em bai i mekim save tu long ol manmeri bilong ol kantri i stap klostu na bilong ol kantri i stap longwe."

Ok sekuriti gad bilong yu em ol ensel bilong God we em i salim long heven i kam daun long graun long was long yu na banisim yu long ol spirit nogut i kam long bagarapim yu. Ol dispela samt-ing em bilong lukautim yu insait long spirit long olgeta de. Yu mas ritim na putim long tingting bilong yu na karim raun prea na mekim tok propet long sindaun na laip bilong yu.

Buk Song 91:11-12 Bikpela bai i givim wok long ol ensel bilong was long yu long olgeta wokabaut bilong yu. Na bai ol i karim yu long han bilong ol, nogut wanpela ston i sutim lek bilong yu.

Buk Song 34:7 Ensel bilong Bikpela i save stap klostu long ol manmeri i anit long Bikpela, na em i save helpim ol bai ol i no kism bagarap.

Psalms 121:4-7 Harim gut. Em i save lukautim ol Israel, na em i no save slip liklik. Nogat tru. Bikpela em i wasman bilong yu. Em i save sanap klostu long yu na i was long yu. San i no inap kukim yu nogut, na long nait mun bai i no inap bagarapim yu. Bikpela bai i was long yu bai samt-ing nogut i no ken bagarapim yu. Em bai i lukautim yu.

# Foapela kamap diken long Bogenvil

**Augustine Sarughu i raitim**

LONG Tunde namba 16 Epril i bin gat bikpela selebressen i kamap long Hahela Viles long Atonomus rijon bilong Bogenvil.

Foapela seminariem i bin kism odinesen bilong kamap diken.

Ol seminariem em Kingsford Taraiti, hap kas Duke of York, Is Nu Briten Provins na Torokina, long Bogenvil, Basil Sango bilong Murua ples long Haisi Peris, Anthony Kavelo bilong Nissan ailan na

Giles Itamari bilong Tunuru Peris, olgeta bilong Bogenvil.

Bogenvil daiosis i tok dispela foapela mani i kamapim histori bilong Katolik Sios long Daiosis bilong Bogenvil.

Bisop Bernard Unabali bilong Bogenvil Daiosis i go pas long odinesen.

Planti lain long Tunuru, Haisi, Nissan, Torokina na Milmila long Duke of York i bin kamap long lukim dispela odinesen.

Stap tu long dispela ol odinesen em Presiden bilong Atonomus Bogenvil Gavman Dokta John Momis.



Seminarian Kingsford Taraiti wantaim ol famili bilong em ol bilasim em long pasin kastom bilong ol lain bilong em. Poto: Augustine Sarughu

# St Martin De Porres amamas pesto de

**Nicky Bernard i raitim**

ST Martin De Porres long Morata insait long Pot Mosbi i amamasim pestode bilong ol long Sande las wik.

Dispela de bilong ol i bin kamap gut tru taim Kardinel John Ribat i bin go mekim bikpela misa na amamas wantaim ol.

St Martin De Porres em ol sms pater save go pas long en na bikpela opis na daiosis bilong ol i stap long Kiuga long Westen Provins.

St Martin De Porres long Morata i wok long gro go bikpela moa yet na long las yia i mekim haus lotu bilong ol go bikpela long kism moa manmeri na pikinini. Insait long dispela peris nau i gat moa long 7-pela BCC we ol save karim aut ol pre miting bilong ol.

Dispela peris long Morata i senisim tu sindaun bilong planti manmeri



Kardinel John Ribat i blesim ol pikinini long insait long St Martin De Porres haus lotu long Sande. Poto Nicky Bernard.

na pikinini long dispela pestode, bikpela amamas i bin kamap long peris bilong ol.

St Martin De Porres tu i

kism bikpela moa amamas long Sande taim Kardinel John Ribat i opim nupela opis bilong ol. Dispela opis em bilong lukautim olgeta

BCC lain insait long Morata. Dispela nupela opis i stap baksait tasol long nupela haus lotu bilong ol.

Kardinel Ribat i tokim ol

long lukim dispela opis bilong ol long wanem hatwok bilong ol yet long kamapim dispela nupela opis.

# Wantok Komentri

# Stopim pasin bilong yusim sosel midia long pretim ol manmeri

**NAP** tupela wik nau, kain kain paul toktok i bin kamap long sosel midia olsem Facebook long ol man i raun long kar na stilim ol meri na pikinini long Pot Mosbi. Pastaim ol ripot i toktok long ol meri tasol. Na nau i gat ol ripot i tok ol lain i wok long stilim ol pikinini tu. Bikpela pret i kamap na sampela pikinini i no go skul. Ol i harim stori bilong ol man i stilim ol pikinini olsem na ol i pret na stap long haus.

Ol polis i no amamas long ol dispela paul toktok i wok long mekim ol pipel i pret nating. Polis i tok sapos ol pipel i witnes long kain pasin olsem i kamap, orait ol i mas go stret long polis stesin na putim ripot. No ken putim nating ol tokwin long Facebook na mekim ol pipel i pret nabaut.

PNG em i wanpela kantri we ol kain kain tokwin i ken kamapim bikpela hevi.

Long las wiken, bikpela trabel i kamap ausait long Boroko Polis stesin bihain long tokwin i kamap olsem ol polis i bin holim wanpela man long dispela trabel bilong traim holim ol meri. Bikpela lain tru i kamap banisim polis stesin na ol polis i sut long gan long rausim ol dispela pipel. Wanpela yangpela man i bin dai long taim katres i bin kisim baksait long het bilong em. Em nau, narapela bikpela hevi gen i kamap.

Pot Mosbi em i wanpela ples i no seif tumas long ol mama na yangpela meri. Oltaim i save gat ripot bilong ol stilman i pikpoket long ol o i pulim bilum bilong ol o traim bagarapim ol. Ol mama na yangpela meri i gat stori bilong ol yet long kain pasin olsem i kamap long taim ol i go long maket, o wetim bas o ol i sindaun insait long PMV. Na nau i gat ol tokwin i kamap tu long ol



lain i katim bodi bilong man long kisim ol kain samting olsem lewa long salim na kisim mani. Dispela kain tokwin tu em i no tru. Ol dokta i ken tokim yumi stret olsem man nating i no inap long mekim dispela kain wok bilong ol speselis dokta. Em ol giman tokwin nating bilong sosel midia.

I gat gutpela bilong sosel midia na i gat nogut bilong en tu. Yumi yusim sosel midia long toktok wantaim ol famili na pren bilong yumi. I gat ol gutpela infomesen yumi ken serim tu long dispela rot. Tasol i gat sampela lain husat i yusim sosel midia olsem

Facebook long krangki rot. Ol i lukim dispela samting olsem tul bilong salim tokwin i go kam na ol i yusim tu long daunim nem bilong ol arapela manmeri.

I gat lo i stap bilong kotim ol lain i yusim sosel midia long bagarapim manmeri o long mekim ol pipel i pret na kamapim trabel.

I gat tu ol gutpela polis opisa bilong yumi i stap. Ol pablik i ken kamap na putim ripot sapos ol i witnes long wanpela kraim i kamap. Em i wok bilong ol polis long mekim wok painim aut na arestim ol trabel

manmeri. Mobeta yumi go ripot stret long polis na maski long salim toktok long sosel midia long pretim nating ol arapela manmeri. Dispela pasin tu bai i no inap long bringim ol lain i kamapim trabel i go long han bilong lo.

Em i wok bilong yumi olgeta long givim gutpela stia toktok long ol famili na wantok bilong yumi long stopim pasin bilong yusim sosel midia long krangki wei. Stopim pasin bilong pretim ol meri na pikinini. Ol i gat raits bilong ol long stap fri na wokabaut raun long wanem hap ol i laik go long en.

# Putim tingting bilong bel isi long ol sumatin, Bel Isi Edukesen

LONG Epril, samting olsem 700 pipel bilong kain kain hap bilong sosaeti olsem ol tisa, lida bilong politik na rion, meri na yut grup global bel isi ektiviti, na nius repota olgeta i bin bung wantaim insait long Bucharest long toktok long wok bilong bel isi bihain long bel isi edukesen.

Wantaim ol taitel bilong 'Ol wok bilong tisa long bel isi edukesen', 2019 Bel isi Edukesen Konpres em bung we i bin tokaut long wok bilong bel isi stap long Yurop na ol rot bilong divelopim kalsa bilong bel isi wantaim lukaut bilong intenesenel lo bilong bel isi.

"Dispela em bikpela samting. Tasol dispela em wankain olsem olgeta rot bilong laip i save stat wantaim namba wan stap, long mekim awenes bilong bel isi i mas kamap pastaim long ol arapela bikpela samting. Wantaim dispela edukesen, ol pikinini i mas save gut olsem ol i gat pawa long mekim gutpela pasin antap long level bilong ol. Ol i ken senisim laip bilong ol na bihain taim laip bilong famili bilong ol. Mi traim long mekim ol luksave long i laip na rispekim, helpim arapela, na mekim ol luksave gutpela sumatin olsem tru-



'Bel isi driman' ol sumatin i bin bung wantaim long Bel isi Edukesen Konfrens.

pela lida," tisa bilong Mai Teknikol Hai-skul bilong Ploiesti husat i bin go pas long lukautim bel isi edukesen, Mista Dumitru Marius Gabriel i tok.

"Wok wantaim HWPL long dispela projek i bin bringim planti amamas na bel isi bikos mi ken bungim olgeta wantaim. Mi lukim olsem em impoten long mipela ol tisa long kamap gutpela piksa long ol sumatin bilong mipela. Mi laikim dispela bel isi edukesen long go het na kamapim bel isi wok bilong bihain taim tumbuna long stopim olgeta woa. Dispela edukesen i mas go aut long olgeta hap bilong wol long

wanem ol em bihain taim bilong bel isi," em i tok moa.

Wanpela bilong ol dispela impoten edukesen em ol wok bung wantaim lokal ogenaesen na intenesenel NGO long go het wantaim dispela program. Ol tisa bilong ol Masta Bel isi, lokal Romania yut grup, i bin karim aut dispela bel isi edukesen. Na ol program na samting bilong bel isi edukesen we ol NGO nem HWPL i bistatim.

Long ripot bilong HWPL, dispela bel isi edukesen em kamap wantaim driman bilong lusim bel isi olsem mak bilong bihain taim jeneresen long

skruim awenes long tingim bel isi na divelopim kalsa bilong bel isi. Dispela em i bin kamap long buk, bilong bel isi ektiviti na bel isi agrimen olsem HWPL i bin holim long olgeta skul long givim gutpela skul tok long olgeta sitisen long wokim bel isi wok. Olsem wanpela hap bilong bel isi wok, moa long 200 edukesen institusen insait long 21 kantri i i bung wantaim Romania, Republik ov Saut Afrika, India, Israel, Kosovo, ol Filipins i kisim na olsem HWPL Bel isi Ekedemi long trenim ol eduketa na sumatin wantaim ol valiu bilong bel isi insait long kalsa na rion bilong ol yet.

# Autim Tingting...

**Dia Edita,**  
**Planti hevi long Bogenvil**  
Planti manmeri long Bogenvil, ol i no gat tingting long referendum. Ol i wok long spak, kukim kilim man indai na kamapim moa hevi long ailan. Bogenvil i mas tingting long bihain taim na stop long mekim kain kain pasin no gut.

**Paul Kay, Arawa**

**Dia Edita,**  
Gat rispek long Gren Sif Mi laik strongim toktok bilong gavman bilong Is Sepik i kamap long Ogas 2018. Mipela i mas i gat rispek long Sir Michael Somare long karim kantri i kam long dispela mak. Ol lida i mas bihainim lek mak bilong em na tu kamapim gutpela moa wok long apim nem bilong kantri.

**Dickson Jiki, Simbai Ramu, Madang**

**Dia edita,**  
PNG Made tasol prais dia tumas Prais bilong ol samting ol i wokim long PNG yet na raitim PNG Made i dia tumas. Em bilong wanem as tru ol kampani na bisnis haus i mekim olsem? Sapos ol i kisim ausait na baim planti kain kain takis na i apim prais tu bai orait. Mi lukim olsem prais bilong ol samting i kam ausait i stap daunbilo na ol dispela ol i wokim long PNG yet i d i t u m a s .

**George, Uzu, Duad Ailan, Madang**

**Dia Edita,**  
**Gavman i no tingim Karamui Haidro,**  
Inap yu givim mi liklik spes long autim wari bihaus, kilim man indai na kamapim moa hevi long ailan. Bogenvil i mas tingting long bihain taim na stop long mekim kain kain pasin no gut.

bai gat sampela luksave o no gat? Envairomen bilong mipela dispela projek i bagarapim. Projek i stat long yia 2017 na baim pinis long yia 2023.

**Emimi Gurias, Karamui, Simbu**

Sapos yu gat sampela toktok o tingting, yu ken salim sms teks i kam long dispela digicel namba: **71845906** na bai mipela i putim long niuspepa.

# WANTOK

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: [editorial@wantok.com.pg](mailto:editorial@wantok.com.pg)

Pe bilong wanpela yia 52 niuspepa

<b>Ples:</b>	<b>Air:</b>
PNG	K230.00
AUSTRALIA	US\$120.00
ASIA PACIFIC na JAPAN	US\$150.00
AMERICA na EUROPE	US\$210.00

**General Manager**  
Elizabeth Konga

**Editor**  
Frieda Sila Kana

Printed and Published at: Dove Travel Building, Level 2, Section 24, Lot 25, Angau Drive/ Lahara Avenue Junction, Boroko

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

STORI TUMBUNA

# Laitim paia na painim meri

**L**ONG bipo tru, taim yu na mi no stap, i gat tupela susa i stap long ples maunten long Nondugl long Minj. Nem bilong tupela susa em Muno na Wasep. Tupela i no gat papamama. Tupela i kamap aninit long graun klostu long wanpela bikpela ston.

Long dispela taim i no gat wanpela man i stap. Tupela i save pret long wokabut i go longwe long haus bilong tupela. Tupela i save wok long banis gaden bilong tupela long sankamap. Ol i save go bek long maunten long taim san i go daun na brukim paiwut na kukim kaikai bilong tupela.

Wanpela taim long belbek, Wasep i tokim Muno olsem em i laik go painim abus long bus. Muno i tokim em long was gut taim em go long bus, nogut sampela tewel i kilim em. Na em i tokim Wasep long kam-

bek kwiktam long taim san i laik go daun. Wasep i tok gutbai long susa bilong em na i go long bikbus. Em i wok long painim abus i go tasol em i no painim wanpela. Man, em i wok long painim i go i go longwe tru na em i no save olsem tudak i kamap.

Em i lusim rot bilong go bek long haus na em i kamap long het bilong maunten na kra i stap. Nem bilong dispela maunten em Koimbol. Em i klinim ai bilong em na lukim wanpela lait bilong paia i kamap long as bilong maunten. Em i ting susa bilong em i laitim bombom na i painim em i kam. Na em i kirap go daun stret long ples paia i kamap long en.

Taim em i kamap klostu, em i no painim susa bilong em. Tasol em i painim papa bilong lait insait long wanpela haus. Em i go isi isi long haus, tasol em i no

painim papa bilong dispela haus. Em i pilim kol na i go sindaun arere long paia.

I gat tupela brata i save stap long dispela haus. Nem bilong tupela em Koloika na Yambe. Yambe i bin go painim abus na i no kam bek yet na brata Koloika i wok long painim em i go tu. Em i singaut na painim i go na i no gat tru na em i kam bek long haus.

Brata Koloika i kirap nogut tru taim em i painim Wasep i sindaun klostu long ples paia. Tupela wantaim i kirap ngut na toktok wantaim. Orait Koloika i askim Wasep long maritim em na Wasep i tok orait. Tupela i tok long maritim long taim brata bilong Koloika i kam bek. Wasep i tokim em olsem susa bilong em i stap long hapsait bilong tupela maunten.

Long moning taim san i no kamap ausait yet long waitpela klaut, tupela i kirap wokabut i go long bus long painim




haus lain. Tupela i no go longwe yet na tupela i harim wanpela nois klostu long bus. Yambe wantaim Muno i toktok i kam. Ol i amamas tru na

i go bek long haus na kilim wanpela pik na ol i kaikai. Koloika i maritim Wasep na Yambe i maritim Muno na ol i stap gut.

Nau long ples bilong mi, mipela i gat tupela lain man. Wanpela em Muno Yambe kanem na narapela em Koloika Wasep kanem. Kanem

long Tok Pisin em i bin olsem lain. **Joseph Kasil Nuno Nondugl, Minj**

Halivim liklik Tony i go bek long haus bilong em



Pinis

## PAINIM WOD PILAI

A	R	C	O	E	N	O	L	E	E	L	A	R	G	G	Q
G	R	M	C	M	C	E	E	R	R	U	T	U	K	T	P
A	D	S	D	A	E	A	N	I	W	T	O	S	T	F	N
P	F	B	W	F	T	E	R	S	U	R	I	J	M	A	D
T	W	J	X	I	U	A	G	A	R	A	T	O	O	M	R
R	Y	N	K	O	M	I	M	E	N	S	T	I	R	I	S
G	D	R	M	M	I	M	I	A	T	G	N	O	L	O	
O	N	E	A	I	K	Y	W	N	U	R	S	H	L	I	R
Y	A	A	S	E	L	A	A	A	O	A	A	N	I	A	K
N	G	I	T	E	T	N	B	N	N	A	T	W	X	W	S
A	S	O	A	A	A	A	S	I	G	W	I	E	I	N	S
H	N	S	U	I	N	T	U	G	K	S	I	A	B	A	D
S	J	L	A	U	B	I	A	P	O	P	T	N	P	A	H
C	Q	P	A	E	G	H	B	T	U	X	L	A	G	T	R
Y	K	R	U	N	G	U	T	I	M	C	H	E	A	E	S
Y	A	A	O	S	V	O	C	I	L	S	N	I	S	L	D

OL WOD LISTA:

- HANANAS,
- BETA,
- BIKPLES,
- BINATANG,
- FAMILI,
- GUTNIUS,
- HAIWARA,
- HAPAS,
- JOIN,
- KAIN,
- KOMIM,
- KRUNGUTIM,
- LETA,
- LONGTAIM,
- MASTA,
- MISIS,
- PAIA,
- POPAI,

- RAUNABAUT,
- SELA,
- SOTWIN,
- SWIM,
- TARAGAU,
- TEKIMAUT,
- WANWING,
- YANG,



### Stori i kam long Buk Baibel

## Daniel i kilim snek masalai

I GAT wanpela bikpela snek masalai tu, ol Babilon i save lotu long en. Wanpela de king i tokim Daniel olsem, "Yu no ken tokim mi dispela god i no gat laip. Nogat. Em i gat laip. Olsem na yu mas lotu long em." Na Daniel i tok, "Mi save lotuim Bikpela, em wanpela tasol i God na i gat laip. Na king, sapos yu orait, bai mi kilim dispela bikpela snek masalai. Na mi no ken yusim bainat na stik." King i tok, "Goan. Yu traim."

Orait Daniel i kisim sampela kolta na gris na gras bilong man na em i kukim olgeta wantaim. Em i wokim sampela liklik kek na i givim long dispela snek masalai. Snek i kaikai ol dispela kek pinis, orait em i solap na bel bilong en i bruk. Na Daniel i tok, "Oلمان! Wanem kain god bilong yupela?"

Taim ol Babilon i harim tok bilong dispela samting i bin kamap, ol i wokim bikpela tok kros bilong daunim king bilong ol. Ol i singaut olsem, "King bilong yumi i kamap man bilong Juda pinis. Pastaim em i bagarapim god Bel na i kilim i dai ol pris bilong em. Na bihain em i kilim i dai bikpela snek masalai bilong yumi."

Ol i go long king na ol i tokim em olsem, "Yu mas givim Daniel long han bilong mipela. Sapos nogat, bai mipela i kilim yu na ol famili bilong yu wantaim." Ol i putim bikpela hevi long king na em i pret na i givim Daniel long han bilong ol. Orait ol i tromoim Daniel i go daun long hul ol laion i stap long en. Na ol i larim em i stap inap 6pela de. I gat 7-pela laion i stap long dispela hul. Long olgeta de ol i save kaikai tupela man na tupela sipsip. Tasol i Babilon i laik bai ol laion i mas kaikai Daniel, olsem na long dispela taim ol i no givim wanpela kaikai long ol.

Stori bilong Bel na bilong Bikpela Snek Masalai

# Ol Hailans gavana lusim PNC pati

Hilda Wayne

Faipela memba bilong gavman i risain long gavman bihainim memba bilong Tari Pori, James Marape husat i bin risain las wik.

Dispela ol lida em gavana bilong Enga Sir Peter Ipatas, Sauten Hailans gavana, William Powi, Hela gavana, Philip Undilau, memba bilong Esala Steven Davis na memba bilong Komo Magarima, Manasseh Makiba.



Ol pipel bilong Manam wetim promis bilong O'Neill nau hevi kamap gen. Poto: PNC 4 PNG

Hela gavana Philip Undilau i tok ol i mekim dispela disisen long wanem

ol no gat moa bilip long lidasip bilong Praim Minista Peter O'Neill.

Em i tok em ol lida husat i bin stap bung wantaim long givim sit

bilong praim minista long Peter O'Neill na nau ol i lusim bilong wanem ol i no laikim ol disisen bilong dispela gavman long planti samting.

Mista Undilau i tok em i gat bilip olsem ol nara-pela memba husat i stap long gavman tu i ken lukim ol hevi i kamap nau long kantri na mekim disisen bilong ol tu.

Em i tok ol bai stap redi nau long wokbung na lukluk long wanem samting ol bai mekim bihain long dispela muv.

# Oposisen memba Kerenga Kua tok gavman i mas senis

Hilda Wayne

I gat wanpela moa wik long stap na bai nesenal palamen bilong i sindaun na toktok bilong Vot ov No Konfidens long rausim Praim Minista Peter O'Neill na gavman bilong em.

PNG gavman i lukim pinis wanpela gavana i go joinim oposisen na dispela mun, tupela minista tu i bin risain long posisen bilong tupela.

Long las wik sampela moa memba na gavana bilong Pipels Nesanel Kongres pati (PNC) i lusim pati long wanem ol i tok ol i no gat bilip long lidasip bilong Mista O'Neill.

Tok pait egensim korapsen na planti ol nara-pela samting em i gat toktok i kamap long Oposisen tasol Oposisen i no gat namba yet long winim wanpela vot ov no konfidens.

Atoni jeneral bipo na memba bilong Sinasina Yongomul, Kerenga Kua i tok korapsen i kamap

nomol long kantri na dispela i putim kantri long mak nogut.

Em i tok dispela i mas soim ol lida olsem dispela gavman i mas senis long taim bilong vot ov no konfidens long Me 6.

Mista Kua i tok taim ol lida i risain na lusim gavman, dispela i soim olsem i no gat gutpela lidasip. Na em i askim ol lida bilong gavman long joinim Oposisen na rausim Praim Minista Peter O'Neill.

Tasol Minista bilong Tred na Komes na memba bilong Chuave na Pipels Nesanel Kongres pati, Wera Mori i tok dispela gavman i stap strong yet na no gat wanpela senis bai kamap.

Em i tok disisen bilong ol lida long risain em rait bilong ol yet tasol gavman bai stap yet.

Mista Mori i tok tu olsem toktok bilong korapsen i no wok bilong gavman tasol, olgeta pipel tu i mas pait egensim dispela samting.

# Honiara stap isi bihain long ol trabel

Sam Seke

KEPITAL bilong Solomon Ailan, Honiara i stap isi nau bihain long ol pipel i bin belhat na bagarapim ol samting bihain long Palamen i vot long Manasseh Sogavare i kamap praim minista gen.

Ol polis i bin arestim sampela pipel pinis long statim trabel bihain long 34 memba bilong pala-

men i bin votim Mista Sogavare na 15 memba i bin sapotim nara-pela kendidet, Mathew Wale.

Ol pipel i bin belhat bikos Hai Kot i bin tok palamen i no ken holim ileksen bilong praim minista inap kot i harim salens bilong nominesen bilong Mista Sogavare.

Bihain long dispela ileksen, Mathew Wale i tok bai kolisen grup bi-

long em i salensim disisen bilong Gavana Jeneral long gohet wantaim ileksen bilong praim minista, egensim disisen bilong Hai Kot.

Polis Rispons yunit i redi long stopim ol trabel long Honiara. (RSIPF poto)



# Ol Katolik sios long Sri Lanka i pas bihain long bom kilim ol pipel long Ista

Gavman bilong Sri Lanka i putim tambu long ol Muslim meri i haitim pes bilong ol long laplap long ol pabik ples. Ol Katolik haus lotu tu i pas bihain long sampela lain i bin pairapim ol bom long Ista Sande na kilim samting olsem 250 pipel. Ol dispela samting i kamap long taim sekyuriti bilong kantri i mekim

wok bilong painim husat tru i bin mekim dispela pasin bilong ol teroris.

Ol ki poin:  
● Presiden bilong Sri Lanka, Maithripala Sirisena i tambuim ol lain long karamapim pes bilong ol bikos dispela i haitim pes na i no isi long luksave long pes bilong ol.

● Dispela imejensi lo i

tambuim ol Muslim meri long karamapim pes bilong ol long taim ol i raun long ol pabik ples.

● Ol i pasim ol Katolik sios bikos i gat ripot olsem sampela teroris i wok long hait yet i stap.

Dispela em i namba wan taim tru long pasim olgeta Katolik sios long Sri Lanka. Tasol gavman i bin kisim ripot i kam

apim ol teroris i haitim pes bilong ol na mekim trabel.

long US Embasi long Kolombo olsem sampela teroris i hait i stap yet wantaim ol bom na ol tingting planti.

Ol lain bilong teroris grup Islamik Stet i tok ol i bin bomim ol dispela haus lotu long Ista Sande. Ol dispela bom i bin kilim 250 pipel.

Presiden Maithripala Sirisena i tok tu olsem i

tambu ong ol manmeri i karamapim pes bilong ol bikos ol i laik lukim gut pes bilong ol pipel nogut sampela teroris i haitim pes bilong ol na mekim trabel.

Ol dispela imejensi lo i bin stat long las wik Mande bihain long kabinet bilong Sri Lanka i bin givim tok orait.

# Polis na ami stopim moa pait long Erave



PNGDF go insait long Hela long helpim misineri na ol pablik sevan. Poto: Hela Disaster Operations Command Centre

Hilda Wayne

Ol soldia bilong PNGDF na polis mobail skwat long Hela i bin mekim wanpela wok bilong helpim na kisim bek sampela misineri na pablik sevan long Erave distrik bihain long traibel pait i bin kamap long hap.

Hela polis komanda, Gideon Kauke i tok, tripela pipel i bin dai pinis na planti haus samting em ol i bin kukim long taim bilong dispela pait. Pait i bin kamap bihain

long dai bilong wanpela skul tisa tupela wik i go pinis.

Em i tok 30 polis na ami opisa i stap yet long stopim moa pait i kamap.

Mista Kauke i tok tenkyu long ol ami na polis husat i bin go insait long pait eria na helpim ol lain husat i no gat rot long ranawe.

Em i tok ol ami na polis i stap yet long pait eria long stopim moa pipel i dai na hevi long kamap na ol bai stap inap ol lain i laik kamapim bel isi gen.

# Ol Katolik long Sri Lanka i pre ausait

Praim Minista bilong Sri Lanka, Ranil Wickremesinghe, i tok bai ol i kisim stia toktok bilong ol lida bilong Islam lotu long ol strongpela tambu gavman i bin putim nau bihain long ol teroris i bin bomim ol haus lotu long Ista Sande.

Long taim ol Katolik sios i pas, planti ol bilipmanmeri i putim on televisen bilong ol na pre long taim Kardinel Malcolm Ranjith, Asbisop bilong Kolombo, i wokim lotu long sampela lain pater long liklik haus lotu insait long haus bilong em.

Ol lida olsem Mista Sirisena, Praim Minista Mista Wickremesinghe na Oposisen lida Mahinda Rajapaksa tu i bin go long dispela lotu long haus bilong Kardinel Ranjith.

Ol ripot i tok olsem



Ol Katolik long Sri Lanka i sanap long rot na pre long taim wanpela sotpela lotu i kamap ausait St Anthony sios we bom i bin pairap long Ista Sande na kilim ol pipel. AP: Eranga Jayawardena

kros bilong politiks na slek gavman i mekim na gavman i no bin mekim wanpela samting hariap long taim ol i bin kisim tok save olsem ol teroris bai bomim sampela

arestim 48 saspek na ol i putim was long olgeta rot insait long kntri. I gat 21 milien pipel bilong Sri Lanka.

Gavman i tok tu olsem bai em i givim

pablik ples. Ol dispela bom i bin pairap long tripela haus lotu na tupela bikipela hotel.

Ol polis i tok 24 aua bihain long dispela birua i bin kamap, ol i

bikpela mekim save long ol lain husat i wok long putim ol giaman nius long pablik o husat i mekim ol toktok bilong sutim bel bilong ol pipel long kamapim trabel.

Oi Poto Nicky Bernard.



Praim Minister Peter O'Neill wantaim meri bilong em Linda Babao i go putim plawa long Bomana Woa Semetri tingim ANZAC De.



Wanpela bilong ol soldia bilong Australia i sanap wantaim gan i go daun long graun.



Tupela Deputi Hai Komisina bilong Australia na Nu Silan i kisim plawa bilong tupela long go lusim long soim sori bilong ol.



Minista John Kaupa i sanap wantaim sampe-la Australia na Nu Silan lain bihain long bik



Oi lain bilong Australia husat i wokabaut long Kokoda trek na kamap stret long de bilong ANZAC de long woa matmat.



Oi Australia lain i lukluk long nem bilong ol soldia husat i pait long woa.

# Porgera IO laikim nupela maining agrimen

Paul Zuvani i raitim

gut na i mas risetelim ol papagraun long nupela hap long Porgera.

"Inap long 30 yia dispela main i wok long bagarapim laip bilong mipela."

Em i tok stat long taim main i wok long 1989 em Placer Pacific i ranim na bihain Barrick Gold na Zijin Maining, ol kampani i no kamapim wanpela dam long tromoi pipia bilong main i go insait.

Em i tok ol i tromoi pipia i go daun stret long Wara Porgera, Maipam, Kaia na Angelik Riva. Dispela ol wara em ol manmeri i save stap long strong bilong ol.

Placer Pacific i kampani i developim main pastaim bipo long Barrick Niugini na Zijin i



Porgera Main long Enga Provins.

kisim ples na developim main.

Enga Gavana, Sir Peter Ipatas i tokim *Wantok Nius* long las wik olsem stat long taim

main, em i bin stap long han bilong ol developa na ol developa i kisim gutpela kaikai long main.

Em i tok ol i luksave long kain sindaun na

nau ol i laik senisim dispela agrimen.

"Lukluk bilong mipela em olsem, em taim bilong mipela long mekim nupela agrimen," Sir

Peter i tok.

"Tripela ten yia i longpela taim na ol investa i kisim mani i go pinis.

"Em taim bilong mipela ol papagraun na

provinsal gavman long kisim moa gutpela samting long wok bilong main.

"Mipela i mas gat samting long strongim provins bihain long main i pas."

Sir Peter i tok sapos dispela nupela agrimen i min, gavman i mas kamap papa bilong main, orait dispela i mas kamap.

Em i tok gavman inap long kisim Ok Tedi Main na dispela i no ken hat long em i mekim wankain long Porgera.

Em i askim Gavman na ol gavman oganaisesen i pas long wok bilong main long ol i mas kamapim ol nupela lo bilong ranim Porgera main.

## Haus rent sas dia yet, ripot tok



Sas bilong rentim kain gutpela haus i bikpela sas tumas long ol kastoma.

SAS bilong rentim ol haus i dia yet, wanpela ripot i tok.

Hausples, wanpela ril estet kampani we i save mesim ol haus bisnis i tok planti ol haus we ol manmeri i save rentim long kastoma long rentim na slip long en i dia yet.

Em i tok 60 pesen long ol kastoma i tok mak bilong sas i bikpela salens long ol na dispela i mekim laip i hat.

Tasol em i tok 27 pesen i tok ol i ken bungim sas long hap ol i stap long en.

Ol i tok ol i no inap bungim sas bilong ol

haus we wanpela hai kavenen haus i ken sasim K3000 i go long K4000 long wanpela wik.

Long setelmen, sas bilong rentim wanpela haus em K1000 i go long K2000 long wanpela wik.

"Dispela ol namba i stap wankain olsem ol i bin stap long en long las yia.

"Pot Mosbi i gat dispela pasin bilong sas bilong ol samting i dia tumas.

"Pot Mosbi i gat nem bilong sasim bikpela rent mak i go long ol kastoma.

Wantaim sas bilong rent na long kost bilong

stap, bilong baim wara na pawa bil, dispela ol kost bungim wantaim bai lukim kost bilong stap I go antap moa.

Inap long 58 pesen ol kastoma i tok nau i gutpela taim long baim haus tasol 15 pesen i tok taim i no yet na 52 pesen i tok ol bai wet inap long wanpela yia pastaim bipo long ol i baim haus.

"Planti manmeri bai wet olsem wanpela yia olgeta bipo long ol i ken baim haus," Hausples i tok.

"Inap long 48 pesen i tok ol bai we olsem 18 mun bipo long ol i ken

baim haus.

"Ol i tok ol i no inap long baim haus inap long ol i lukim prais i kamap gut na sas bilong haus i go daun.

Hausples i tok namba tu samting ol kastoma i laikim em long baim graun.

Inap long 15 ol kastoma i tok ol i laikim ol lo kavenen haus o ol i mas inves long propeti bipo long propeti i kamap gut.

Liklik lain i tok ol bai kisim benk dinau olsem ol inap long baim haus.

Tasol planti lain i tok ol laikim sas bilong haus i mas kamdaun.

## Kina Benk kamapim wok

KINA Benk i tok em bai kamapim moa wok long Papua Niugini.

Kina Benk Sif Eksekutiv Opisa, Greg Pawson i tok benk bai mekim olsem taim em i kisim ol wok ausait i kam insait long kantri.

Em i mekim dispela tok long wanpela kastoma bung long Pot Mosbi we i kamap i no longtaim i go pinis.

Em i tok dispela ol wok bai kamap long wok bilong operesen, teknologi, kredit na risk.

"Stat long taim mipela i tokaut long kisim ANZ Benk Ritel, Komesel na SME (liklik i go long namel sais bisnis), mipela i wok long mekim operesen bilong mipela i go bikpela," Pawson i tok.

"Mipela bai traim kamapim ol wok long opis yet long sapotim ol



Greg Pawson, Kina Benk Sif Eksekutiv Opisa.

nupela prodak na sevis mipela bai kamap long yia.

"Long kredit kad i go long mobail peimen.

"Long nau yet dispela kain ol wok i kamap tasol long ovasis em ANZ i stap long en olsem Fiji, Singapore na India.

"Mipela bai kisim dispela ol wok i kam long

kantri.

"Dispela i no gutpela long benk tasol long kantri wantaim.

"Taim bisnis bilong mipela i gro, mipela bai kamapim moa ol arapela wok bilong olgeta manmeri."

Pawson i tok ol opisa bilong benk i save kamapim ol gutpela wok na dispela i gutpela long sevis kastoma i kisim.

"Mipela i gat ol gutpela manmeri long indastri, dispela i wanpela as wok bilong mipela i kamap gut.

"Taim mipela i bringim dispela ol wok i kam, mipela bai painim ol opisa long kisim dispela ol wok."

Em i tok ol ANZ kastoma husat i kamap kastoma bilong Kina Benk bai go het long mekim samting ol i mekim long ANZ.

## Kina Benk, ANZ wok gut long mekim senis

KINA Benk i wok gut wantaim Australia Nu Silan (ANZ) Benk long mekim olsem no gat rekot mas lus.

Kina Benk Sif Eksekutiv Opisa, Greg Pawson i tok long dispela wik olsem olgeta rekot bilong ol akaun bilong ol kastoma i stap wantaim ANZ bai i no inap senis taim Kina Benk i kamap papa bilong benk long bihain taim liklik.

Em i tok dispela i wankain long ol kastoma bilong Kina Benk we tupela benk i plen long mekim senis long September.

"Mipela i mekim isi long ol samting i kamap gut olsem ol kastoma bilong ANZ i no inap long lusim rekot bilong ol taim ol i kamap kastoma bilong Kina Benk," Pawson i tok.

"Dispela blu kala kad bilong ol bai stap na akaun namba bilong ol tu bai stap yet.

"Mipela i laik mekim wok na laip isi long olgeta lain taim senis i kamap."

Las yia Kina Benk i kisim tok orait long baim na kamap papa bilong ANZ PNG Ritel, liklik i go long namel sais bisnis (SME) na komesel bisnis we bai mekim Kina Benk i namba tu bikpela komesel benk long kantri.

Kina Benk bai baim na ranim olgeta 18 ANZ brens long kantri we ANZ i save ranim.

I gat olsem 80 ATM na 1,500 EFTPOS teminal.

ANZ benk i salim 85,000 ritel na 6000 Komesel na SME kastoma we dispela i kisim olsem AUS\$150 milien (K350 milien) long lening

aset na AUS\$450 milien (K1.13 bilien) long diposit.

"Long dispela taim ol kastoma i no ken mekim wanpela samting.

"Mipela i mekim olgeta samting olsem no gat wanpela rekot i paul na mipela i tokaut long ol wok mipela i mekim.

ANZ Benk Sif Eksekutiv Opisa, Mark Baker i no longtaim i tok em bai kamap Kina Benk kastoma.

"Wankain olsem ol arapela ANZ ritel kastoma na ANZ PNG wok manmeri, mi bai salim olgeta ANZ akaun bilong mi i go long Kina Benk taim Kina Benk i baim olgeta benk bilong ANZ," em i tok.

"Mi save olsem kastoma sevis i wanpela bikpela samting na benk bai go het long skruim dispela wok."



# PM mas tok stret long Papua LNG agrimen: Mekere

MEMBA bilong Mosbi Not-Wes, Sir Mekere Morauta i tok Prais Minista, Peter O'Neill i mas tokaut stret long ol toktok i stap insait long Papua LNG gas projek agrimen.

Em i tok i no gat wanpela tok klia i kamap namel long ol stekholda we i mas kisim gavman, provinsal gavman, ol papagraun na paipplain lenona na ol projek divelopa olsem Total, ExxonMobil na Oil Search.

Em i mekim dispela tok long taim ol papagraun na sampela Membra bilong Palamen wantaim ol manmeri i no amamas long ol toktok i stap insait long agrimen.

Em i tok taim dispela kain sindaun i stap, O'Neill wantaim ol lain em i wok klostu wantaim i go het long sainim agrimen.

"Mi harim na lukim ol



(long lephan i go) Petroleum Minista Dokta Fabian Pok (lephan) Total SA Menesing Dairekta, Jean-Marc Noiray, ExxonMobil PNG Menesing Dairekta Andrew Barry na Oil Search Kantri Siaman Gereva Aopi i sainim Papua LNG agrimen long Gavman Haus, Konedobu. *Poto: File*

ripot olsem dispela agrimen bai kamapim wankain ol hevi em PNG LNG agrimen i kamapim," Sir Mekere i

tok.

"Prais Minista i pasim tim bilong gavman long ol no ken toktok wantaim em na toktok long ol tok i

mas stap insait agrimen.

"O'Neill i no laik bai tim long Petroleum Dipatmen wantaim ol arapela Papua Niugini saveman i

sindaun na tokaut long ol tok i mas stap insait long agrimen."

Sir Mekere i askim long wanem as praim minista i mekim olsem taim em i save long kain hevi i kamap long sainim bilong PNG LNG projek.

Em i tok Papua LNG agrimen bai mekim PNG i lus gen long kisim ol gutpela samting.

"O'Neill na Total wantaim ol poroman bilong em i gat planti askim long bekim.

"Mi laik save long as O'Neill i no laik long harim tok bilong gavman tim we i mas givim stia tok long em. Husat i tokim O'Neill long mekim olsem?"

Sir Mekere i tok ol ripot i soim olsem i no gat wanpela gutpela wok i kamap long Papua LNG projek na i no soim gut teknikal ripot kampani bai divelopim projek.

## Oil, gas prais kamap strong

KINA Sekyuriti, kampani i skelim sea prais bilong ol komoditi long kantri i tok prais bilong oil na gas long las mun i go antap.

Em i tok ripot bilong prais bilong oil long West Texas Intermediate, Yunitet Stet ov Amerika (USA) i soim olsem oil prais i kisim 10 pesen long gro long las mun.

Em i tok long wanpela yia nau, oil i gro 43.6 pesen olgeta.

Em i tok Australia niuspepa *The Sydney Morning Herald* i ripot na tok olsem prais bilong oil na gas i go antap bikos US i putim tambu long ol kantri i baim oil long Iran na Venezuela.

"Yumi lukim, sapos i gat senis long prais bilong gas na oil, dispela bai kamap bikos no gat planti arapela kantri i salim oil," pepa i tok.

"Mipela bai lukim tu sapos Saudi Arabia bai kamapim inap oil long inapim laik bilong oil long wol maket.

"I gat save olsem oil long Saudi Arabia i wok long pinis na em bai kisim moa wok long Saudi Arabia i kamapim gutpela mak bilong oil."

Pepa i tok Amerika oil kampani, Armaco i tok

em inap long kamapim 5 milien barel oil long wanpela de.

Tasol wanpela kampani we i save skelim gut prais bilong oil, West-back Kapital i tok mak bilong ol kantri we i save salim oil bai go daun 1.3 milien barel.

Long wankain taim prais bilong LNG i gro 17.5 pesen long las mun na long wanpela yia i go 40 pesen.

Silva prais i gro olsem 0.1 pesen long las mun na i gro 3.7 pesen long wanpela yia.

Kopa prais i go daun 0.2 pesen na long wanpela yia i go daun 9 pesen.

Long egrikalsa sekta, prais bilong kakao i gro 1.6 pesen long las mun na i gro 5 pesen long wanpela yia.

Prais bilong kopi i go daun 2.6 pesen na i kisim 9.6 pesen long go daun.

Em i tok stap bilong prais bilong ol komoditi i stap long han bilong laik i stap long wol maket na saplai.

Sapos saplai i bikpela na laik i liklik orait prais bilong komoditi bai go daun tasol sapos saplai i liklik na laik i bikpela, orait prais bai go antap.

## Exxonmobil sapatim lokal wokmanmeri



Albert Arawi (lephan) na Kewa Goi i sanap klostu long wanpela bruk kar na i laik stretim. *Poto: ExxonMobil PNG*

EXXONMOBIL, kampani i operet long gas projek long Hela i kisim na trenim ol lokal manmeri long wok.

Dispela i kamap taim kampani i kisim Kewa Goi, Manu Moses na Albert Arawi na i trenim ol olsem aprentis long wok long Hides Gas Kondisening Plent (HGCP) long Komo.

Dispela wok i join program namel long ExxonMobil PNG na HGDC Energy Services Limited (HESL), lokal

Hides Gas Developmen kampani wantaim program em Nesenel Aprentis na Tred Testing Bod i givim tok orait long en.

Tripela man nau i wok long mentenens wok-sop long HGCP.

Kewa Goi bilong Angore i tok dispela wok bilong aprentis bai senisim laip bilong em.

"Mi tok tenk yu long ExxonMobil PNG na HESL long givim mi sans long kisim mekanik trening," em i

tok.

"Mi amamas tu long kampani i givim sapat long ol skul na ol komyuniti wok long hap bilong mi.

Manu Moses bilong Para i tok em i lukluk go het long save em bai kisim long en.

"Famili bilong mi wantaim mi i save painim hat long kisim mani na sapatim mi long go long skul tasol dispela skul i kam wantaim helpim bilong ExxonMobil.

"Mi amamas na tok

tenkyu long kampani na HESL long givim mi dispela sans. Mi bai wok hat long pinisim gut dispela trening bilong mi," Moses i tok.

Albert Arawi bilong Hides long Komo husat i bin kisim trening na setifiket olsem Auto ilektrisen i tok aprentis skul i givim em narapela sans long lain moa.

"Mi amamas long kamap hap bilong dispela tim long senisim laip," em i tok.

Em i tok dispela foa-ya program, tripela yia em ol bai tren long wok ol i mekim na wanpela yia em ol bai go aut long TAFE trening aninit long PNG-Australia teknikal trening.

Dispela tripela man i sampela sapat em kampani i givim long lokal komyuniti long taim ol i wok hat long kamap strong bihain long bikpela guria i kamap na bagarapim planti hap bilong ol long Februeri, 2018.

## Teknoloji helpim long pait egens long pasin korapsen

...sosel midia bringim salens

DIVELOPMEN bilong nupela teknoloji i helpim long pait egens long pasin korapsen.

Dispela long wanem ol lain husat inap tokaut long ol pasin nogut i gat planti rot long tokaut.

Long wankain taim, kain sindaun i promotim gutpela gavanens, akauntabiliti na trensparensi.

Ol toktok bilong aset, travel na rot bilong baim ol samting i kamap isi.

Tasol Esia Pasifik Ikonmik Kopresen (APEC) i tok taim kain samting i kamap, sosel midia i kamapim salens long skelim ol tok sapos ol i tru o no gat.

"Long taim senis long teknoloji i kamap long pait egens long korapsen, i mas gat lo i stap long soim sapos dispela ol tok i tru o no gat," Marta Herrera, Siameri bilong APEC Anti-Corruption and Transparency Working Group (ACTWG) i tok.

"Long taim teknoloji i senis, i gat nupela rot bilong mekim pasin korapsen long senis long teknoloji."

Kamap bilong frod (Fraud) pasin i hat long painim isi we ol manmeri i yusim intanet long baim ol samting, kisim ol trensek-sen rekot o bloksen na crypto karensi.

"Ol stil man i save yusim planti risos long mekim ol paul wok we bai kisim planti taim long painim na luksave sapos wanpela wok i tru o no gat.

Long nau yet, APEC i wok hat long strongim lo bilong banisim save na daunim giaman prodak.

Wanpela APEC grup, APEC Intelektual Propati Rait Ekspet Grup o IPEG i go pas long daunim dispela pasin.

Wok bilong APEC IPEG bai kisim ol wok olsem proteksen na administresen bilong IP rait long rijon.

Ol i tok wantaim senis long teknoloji, planti ol salens i kamap na pasin bilong yusim intanet na stilim save na tingting bilong narapela manmeri i save kamap isi.

Ol memba bilong APEC kantri i luksave long dispela na i laik wok hat long daunim dispela pasin nogut.

# Pikinini I go nau long haus sik!

Stori Mandy Glass. Ol poto David Moore (DM) na Mandy Glass (MG)

“LONG 2 klok apinun, samting olsem 2 klok, Reji Flait Skedula bilong MAF (PNG) i tokim mi osem sapos i laik go raun long baus, nau em i gutpela taim! I gat wangepela medikol evakuesen long mekim long Kol we wangepela pikinini i pundaun long hatwara na kisim bikpela bagarap. Orait mi kalap wantaim pilot long namba wan balus ran long PNG na medikol evakusen.

Balus i bin flai gut, i gat liklik tebuens na naispela taim long lukluk i go ausait na lukim ples. Balus i go daun gut long Kol ples balus.

Pikinini i slip i stap wantaim IV wara ol i givim em. Mipela i kamap long hap long kisim em long balus na flai i go bek, em i bikpela samting. Na 1 awa, 40 minit bihain long mipela i kisim tok save, mipela i kamap bek long Mt Hagen na pikinini ya i go long haus sik.

Yu bai pilim bel bilong yu i stap gut long taim balus i kam bek na yu luksave olsem yu mekim wangepela gutpela wok.”

David Moore i laik save gut long ol medivek wok raun bilong balus. Na em i stori long namba wan taim em i bin flai long balus bilong MAF i go long helpim sikman, sevenpela de tasol bihain long em i bin kamap long kantri.

David wantaim meri bilong em Carroline i kam lukim MAF program long Papua Niugini na tupela bai skelim tingting sapos ol i laik stap na wok long tim bilong mipela.

“Liklik gel ya i go stap long Kudjip Hospital long kisim tritmen long bagarap long bodi bilong em. Mama bilong em i bin boilim



Bikpela lain pipel i wetim balus. (DM)



Pilot Luke Newell i toktok long papa bilong pikinini. (DM)



Poto: Go daun long balus long Mt Hagen. (MG)



Komyunikesen Opisa Mandy Glass i toktok wantaim liklik meri ya. (DM)

hatwara.

Plis pre wantaim mipela long em i kamap orait na em i ken go bek long ples bilong em na i no inap

pilim pen moa. Bihain bai em i ken lukim dispela ekspiriens long laip bilong em na luksave olsem God i bin kontrolim, na i bin gat

planti pipel i sambai long rait taim long helpim em.

Papa bilong em i bin karim em inap tupela de long kamap long

linik na ol Komyuniti Helt Woka i bin tritim em na stretim skin we hatwara i bin kukim na ol i givim IV wara long em.

Ol lain tim bilong CRMF i salim toksave bilong mekim dispela medivek long Mt Hagen programing opis bilong mipela.

Orait ol i ring na askim sapos wangepela pilot inap kam bek na mekim dispela medivek flait long taim san i lait yet long dispela apinun.

Bihain long balus i kamap long Mt Hagen, Komyunikesen Opisa bilong mipela i go kisim ol medivek beg bilong mipela na givim sampela toi na klos na arapela samting ol meri bilong ol ovasis wokman bilong mipela i bin bungim. Em i tok amamas na pre tu long dispela liklik meri.

Palamen memba bilong Jimi, Wake Goi, i givim mani long mekim dispela medivek ran bilong balus. Jiwaka Helt Dipatmen i bin salim embulens i go kisim liklik gel na famili bilong em i go long Kudjip Hospital.

Ol dokta na nes long Kudjip Hospital bai lukautim dispela liklik gel.”

Plis pre long David Moore na meri bilong em long taim ol i lukluk raun long ol wok bilong mipela.

Na ol bai askim Bikpela long stiaim ol long taim ol i skelim tingting long joinim MAF PNG Tim long bihain taim, sapos em i laik bilong God.

APDET

Dispela medivek i bin kamap long Trinde 24

Epril 2019, na liklik gel i bin kamap long Kudjip hospital long apinun tru. Neks de mipela i kisim toksave olsem em i kamap orait na bai em i kisim tupela tupela skin grap. Dokta bai wet liklik inap skin i orait liklik na bai em i ken save we long mekim grap na wanem skin em bai wok long en. Dokta i ting hatwara i kukim 20 pesen bodi bilong dispela liklik meri.

I luk olsem dispela pikinini bai stap long haus sik inap long sampela mun, bihain long ol dokta i mekim tupela grap sejeri long bodi bilong em.

Flying for Life



# Ramu NiCo Projek Helpim Go Yet Long Sios

**S**AMPELA ol Kristen sios insait long Inlen Paiplain eria bilong Ramu NiCo Projek long Madang i bin kisim gut-pela presen bipo long Ista.

Dispela ol presen em ol bilding material i kam long lenona asosesin bilong ol em Inlen Paiplain (Maigari) Lenona Asosesin.

Dispela ol bilding material em Inlen Paiplain LOA i bin yusim wan pesen royalty mani i kam long Ramu NiCo Projek long helpim na saposim wok bilong sios insait long impekt eria.

Ramu NiCo Projek i bin baim namba wan royalty peimen bilong en long mun Julai long las yia 2018. Insait long dispela namba wan peimen ol i luksave long givim wan pesen helpim i go long ol sios na wimen insait long projek eria.

Long Trinde em Holi Trinde, tupela eksekutiv bilong Inlen Paiplain LOA, em deputi siaman yet John Kotty wantaim tresera bilong LOA, Mikoni Weipa i bin ran long bikpela trak na stat givim kapa i go long ol sios we ol i givim nem long kisim helpim. Dispela i bin stat long Naru na ol i go antap olsem long Ono na go long Kawawar maket eria.

Mista Kotty i tok LOA i bin helpim long olgeta lain Kristen sios long Inlen Paiplain eria husat i gat nid na i bin givim nem long kisim helpim.

Dispela pasin na helpim bilong royalty peimen long helpim Sios em wanpela bikpela luksave Ramu NiCo Projek aninit long menesmen bilong divelopa Ramu NiCo Menesmen (MCC) Limited wantaim ol stekholda i bin kamapim. Nogat ol arapela maining o risos projek long PNG i bin mekim wankain pasin olsem.

Mista Kotty i tok ol i givim aut bilding material olsem ol kapa, ain post, ol rids kep, ol simen brik na tu ol arapela samting.

Em i tok ol samting LOA i baim long hadwea stua long Madang em i bihainim nid bilong ol sios na askim ol i givim.

Mista Kotty i tok long namba wan royalty peimen helpim em ol i givim helpim long 30pela sios o kongrigesen na dispela i karamapim Luteran Sios, Katolik Sios, Seven De Adventis (SDA), Nazarene Sios, Saut Si Evanjelikol Sios (SSEC) na ol arapela tu i stap long komyuniti.

Em i tok long neks royalty peimen i kam em moa helpim bilong Ramu NiCo Projek bai go gen long helpim wok bilong sios, olsem na ol arapela husat i no kisim helpim mas noken tingting planti o wari. Taim bilong yupela long kisim helpim bai kam yet.

Long namba wan hap bilong mekim distribusen long las tupela wik i go pinis, Ramu NiCo (MCC) i bin salim ol opisa bilong en long go skelim wok. Komyuniti Afes (CA) Menesa, Albert Tobe wantaim PR Opisa, James Kila i bin go wantaim Inlen Paiplain LOA tim long givim ol bilding materials stat long Naru i go long Kawawar maket we ol i stop long Nuku hauslain na givim ol bilding materials bilong Uria Foa Skwea Sios.

Deputi LOA siamen bilong Inlen Paiplain, John Kotty i helpim long rausim ol bilding material bilong Uria Foa Skwea Sios




LOA lain bringim pos bilong wokim nupela haus bilong pastor long Ono Nazarin Sios



Helpim i go long Naru Luteran Sios



Tupela Sios hetman em Elda Yori Asin wantaim Pastor Tommy Kavaipa i amamas long LOA i bringim simen brik i go long Ono Nazarin Sios



# Ol Rabbitohs i amamas long Wayne Bennet

Wayne Bennet i no bin soim ol Rabbitohs pilaia bilong em video bilong Anthony Seibold na nu-pela lain Broncos tim bilong em tripela de bihain long kros i stap yet long South Sydney pilaia bilong em bipo long tupela tim i bung long pilai.

Las Fraide, Bennet i bin tok pilai olsem em i no save tim bilong em bai pilai wantaim husat tim long dispela wok. Em i wok long traim daunim ol toktok i kamap long olpela klap bilong em na

kosa bilong ol bipo Anthony Seibold long ANZ Stadium long Fonde nait.

Seibold i kamapim nem bilong em olsem wanpela smatpela plena na i save pilai ol video bilong ol gem long redim gut ol pilai bilong em.

Tasol Bennet i no laik yusim ol video bilong olpela tim bilong em, bipo long ol Rabbitohs i kamap long ol nius ripota long Mande apinun we ol i no bin bekim stret sampela askim bilong ol ripota.

Huka bilong ol, Damien Cook i tok, "Mipela i no lukim wanpela video bilong ol Brisbane. Em i narakain.....i no wankain olsem las wik. Tasol em i gutpela na i lukim olsem mipela i mas mekim wok bilong mipela. Em i wok bikos i soim we mipela i no pilai gut na we mipela i mas stretim ol asua na pilai gut."

Ol Broncos i bin raunim Bennet las yia, wan yia bipo long kontrak bilong em i pinis. Na nau

em i bringim ol Rabbitohs i go antap long lata bilong NRL we ol i bin lus long wanpela gem tasol long sevenpela raun nau.

Na Seibold i bringim nupela laip i go long ol Broncos. Ol i bin autim ol Sharks na win namba tu taim. Tasol dispela wok redi long bungim ol Rabbitohs i mekim ol senia pilaia bilong South Sydney i tingim em yet olsem gutpela pren.

Cody Walker i tok em wantaim Seibold i stap gutpela pren yet na ol

arapela pilaia bilong South Sydney tu i tok i no gutpela long tupela kosa i wok long pulim nus yet long senisim wok.

Walker i tok long Seibold olsem, "Em i wanpela gutpela kosa na gutpela man tu. Mipela i sori olsem em i bin lusim mipela."

Wayne Bennet yet sanap stap.



# Campbell-Gillard i redi long pilai long NSW skwat

Reagan Campbell-Gillard i bin kism bagarap long wisket bilong em long taim bilong State of Origin long 2018 olsem na em i no bin pilai long taim ol Blues i bin winim dispela seris. Tasol em i tok em i redi nau long go insait long NSW skwat bilong Brad Fittler.

Dispela pawaman pilaia bilong Penrith i tok olsem bai em i no inap tingting long wankain bagarapim i kamap long wisket bilong em long Sarere nait NRL trail egensim ol South Sydney.

Em i no bin pilai inap 6-pla wik long aim em i wetim wisket bilong em long kamap orait gen. Em i kism bagarap long taim em i bamim Jared Waerea-Hargreaves.

Campbell i bin kism bagarap tu long taim bilong trening long De-

semba long taim Jason Fisher-Harris i bin salim bal long em. Tasol dispela bagarapim no bin bikpela na em i no kism sejeri long en. Tasol Campbell-Gillard i tok bai em i rausim ol dispela tingting long het bilong em bipo long gem bilong ol egensim ol Souths long Redfern.

"Em i wanpela bilong ol dispela samting i save kamap," em i tokim AAP.

"Dispela taim em i orait liklik. Tasol long namba wan taim mi kism bagarap, mi bin kism taim stret bikos ol i putim waia raun long maus bilong mi na mi mas yusim stro long pulim kaikai i go insait long maus.

"Mi orait nau tasol Fish i bin givim taim long mi."

Bikos long dispela bagarap, Campbell-Gillard i no bin pilai long



Reagan Campbell-Gillard i pasim tingting long werim wanpela jersi bilong ol Blues. (AAP Image/Joe Castro) Source: AAP

tim bilong NSW long tupela las State of Origin gem.

Em i gat 25 krismas

nau. Em i tok em i laik

go bek na kism ples long pilai long tim bilong NSW long State of Ori-

gin.

"Em i driman bilong mi. Tasol mi save olsem mi no inap spes nating.

"Olgeta yangpela

mank i save driman long dispela. Mi pasim tingting long pilai na kism

sans hariap. Olgeta yia

bai mi putim dispela driman bilong milong pilai gen,"em i tok.

# Bulldogs i winim sapot

NRL bos bilong futbol, Graham Annesley i tok amamas long ol Canterbury i senisim pasin bilong ol long sloim daun pilai long taim ol i wok long salim bal i go kam. Dispela pasin i bin kamap long namba sikis raun bilong gem na nau ol i pilai gut tru.

Wanpela wik olgeta ol lain i wok long sutim tok long ol Canterbury long taim ol i bin lus long ol Souths 14-6. Orait ol Canterbury i stopim dispela pasin na pilai gut na ol i winim North Queensland 24-12 long ANZ Stadium long las wik Fraide.

"Dispela em i bin gutpela tru bikos ol i no holim bal longpela taim tumas na i no bin gat planti penaliti tu,"Annesley i bin tok.

I bin gat 10-pela penlti long taim bilong pilai, sikispela i kamap long hap bilong rak.

Long Sarere nait gem long Tamworth, i bin gat 20 penalti we i bin gat 2-pela long rak, ol Wests Tigers i bin holim bal longpela taim liklik long gem bilong ol egensim Gold Coast. Ol i bin winim Gold Coast 30-14.

"Long dispela wik, mi singau long ol titans i bikos ol i slo tumas long pilai," Annesley i tok.

"Las wik ol i bin stap long sait bilong ol Bulldogs. Stori hia i soim olsem yu no ken sloim daun gem long taim bilong play-the-ball na winim gem. Ol Bulldogs i bin soim dispela las wik.

"Dispela i soim bikpela senis na mipela i amamas long dispela bikos gem bai i ken ran gut na larim ol tim i pilai gut na winim gut pilai.

"Mipela i no laik ol tim i bagarapim sans

bilong arapela tim na brukim lo long dispela eria. Sapos ol pilaia i laik slo daun long play-the-ball, orait penalti bai i go antap na bai gem i stop planti taim."

Annesley i tok em i bilip penalti long rak egensim fowad bilong ol Warriors, Adam Blair na Isaiah Papali'i we i bin helpim ol Storm long levelim skoa, 12-12 long Melbourne long ANZAC de, em i no stret. Em i tok long dispela taim i mas gat wanpela skram i kamap.

Annesley i tok referi Matt Cechin i gat rait long givim dispela penalti bikos ol pilaia i bin bung bung long hap bilong rak, tasol em i bilip kepten bilong ol Storm, Cameron Smith i bin nok-on bihain long Jesse Bromwich i traim long salim bal bipo long em i kirap sanap.

# Storms autim Warriors na Rooster winim Dragons

Ol Melbourne Storms i kam long baksait na winim Nu Silan Warriors 13-12 na ol lain Sydney Roosters i autim St George Illawarra Dragons 20-10 long SCG.

Fil gol bilong Brodie Croft klostu tasol long ful taim i bin helpim tim bilong em long winim dispela gem 13-12 long ANZAC de salens long AAMI Park.

Dispela hap bek i bin kikim bal long 35 mita aut na bal i paitim pos na i go insait.

I luk olsem ol Storm bai lus gen long dispela gem, tasol Isaiah Papali'i i bin kism penalti bikos em i bin holim bal longpela taim tumas long play-on long taim foapela minit i tasol stap bipo long full-taim.

Ol kika bilong Storm olsem Cameron Munstwe, Croft na Cameron Smith i no inap



Ol Storms i strong na abrusim ol Warriors long win.

kik bikos ol i bin kism liklik bagarap na skoa i sanap 12-12.

Em nau Croft i kam kism bal na em i kam gut.

Kepten Roger Tuivasa-Sheck i kism bagarap long lek masel, hapbek Blake Green i kism bagarap long lek na ol i

lusim ples bilong pilai. Na Solomone Kata i no bin pilai. Patrick Herbert i bin kism ples bilong Kata na em i bin pilai gut.

Las yia, skoa bilong gem bilong dispela tupela tim i bin stap long 36-0. Na long dispela gem, ol Warriors i bin go pas

wantaim 8 poin na ol Storms i gat 4 poin tasol inap haptaim.

Ol Storm i kirapim paia tripela minit insait long namba tu hap bilong gem long taim Smith i salim bal i go long fulbek Jahrome Hughes na em i putim trai.

# GOTUNO, WERA bai pilai long raun 9 Intras Supa Kap

**Adex Wera na Brendon Gotun bai pilai long dispela wik Sande Intras Supa Kap Raun 9 resis wantaim Townsville Blackhawks long Pot Mosbi.**

Patrick Morea statim huka taim Justin Yoka, Dilbert Isaac, Wawa Paul na Rex Kaupa bai wet long ausait long senisim ol.

Dispela em 20 man skwat:

1. Bland ABAVU
2. Junior RAU
3. Adex WERA
4. Brendon NIMA
5. Brendon GOTUNO
6. Ase BOAS
7. Charlie SIMON
8. Moses MENINGA - Captain
9. Patrick MOREA
10. Enock MAKI
11. McKenzie YEI
12. Epel KAPINIAS
13. Junior ROP

Interchange

14. Justin YOKA
15. Dilbert ISAAC
16. Jordan PAT
17. Daniel TAPOL
18. Wawa PAUL
19. Gairo Kapana
20. Rex KAUPA
21. (Three to be omitted)

Kosa Michael Marum bai makim fainel 17 pilaia long Kepten Ran long Sarere.

SP Hunters na Townsville Blackhawks bai pilai bilong Air Niugini Kokoda Kap we i bin stat long 2017 na nau SP Hunters bai holim. Dispela Air Niugini Kokoda Kap i kamap long tingim bipo lain husat i bin pait na dai long Kokoda na tu namel long Pot Mosbi na Townsville we Air Niugini i bin tokaut long 2017.

Gem bai stat long 3 klok apinun long Sande Me 5 long OSNFS. Namba wan gem em bai ol Digicel Kap

Raun 5 resis namel long Hela Wigmen na Galp Isou na bai stat long 12.45 apinun.

Bihain bai ol SP Hunters na T/Ville Blackhawks gem i kamap na bihain tupela bai NCDC Vipers i salensim PRK Mendi Muruks long 5.15 apinun.

Joe Joshua na Joe Frank i bin raun long SP Hunters kemp bihain long tupela i bin spak na brukim lo bilong tim.

Tupela Hunters pilaia William Mone na Jack Oii bai stap aut long kemp inap tupela kisim toksave long joinim tim gen.

SP Hunters pilaia harim toktok bilong Michael Marum long fil tu bilong Nesanel Futbal Stadium (NFS) bihain long trening bilong raun 9 Intras Supa Kap.

(Poto Jacklyn Kimala)



## Laiwaden givim gutpela salens long Toti City FC

**James G. Kila I raitim**

LAIWADEN FC i bin givim gutpela salens tru na soim tru kala taim ol i bin pilai wantaim kompetisen lida bilong Petroleum Nesanel Soka Lig (NSL) long Noten Konferens las Sarere.

Laiwaden i bin lus long Toti City 2-1 tasol planti lain husat i lukim dispela gem i tokaut olsem Laiwaden i pilai smat moa na i bin gat planti sans tru long skorim gol na winim dispela gem tasol ol i popaia na Toti City i winim gem.

Toti City i bin yusim ol strongpela pilaia bilong ol olsem kepten Raymond Gunemba, straika bilong ol Emmanuel Airem wantaim midfilda Emmanuel Simon

Laiwaden i bin yusim planti ol yangpela pilaia bilong ol husat em nu-

pela nau tasol i pilai long bikpela soka kompetisen na bai karim nem bilong Madang long bihain taim.

Wanpela kosa pastaim Bonny Hans i no wanbel tumas long ol gem opisol i lukautim dispela gem namel long Laiwaden na

Toti City long wanem em i lukim olsem referi i wok long givim planti penelti tumas i go long Toti City, na taim ol i mekim ol faults long ol Laiwaden pilaia referi no save blowim wisil na givim penelti.

Narapela samting

Hans i no amamas long en em pasin bilong Toti City long westim taim long pilaim bal na isi na wok long kilim pilai.

Dispela gem namel long tupela tim i lukim ekspiens i winim gem bilong Toti City na lukim ol i sindaun antap yet

long lada bilong Noten Konferens.

Laiwaden i stap yet long tamblo long lata na dispel wiken ol bai pilai laspela gem bilong ol long Noten Konfederet. Toti City FC wantaim Morobe Yunaited i stap antap long lata.

## KPNSL go insait long las gem

**Nicky Bernard i raitim**

KUMUL Petroleum Nesanel Soka Lig go insait long las gem bilong ol long dispela wiken i kam na bai lukim tupela top tim long Rijon bai salensim ol gen long lukim husat tru bai kamap sempion bilong KPNSL.

Sauten Konfederet bai go insait long las pilai bilong ol long dispela wiken, tim i go pas long em Hekari we ol i winim olgeta pilai bilong ol stat long raun wan i kamap long laspela pilai bai kamap long wiken. Dispela i mekim ol klia olgeta long poin lata.

Tripela tim nau bai resis long dispela wiken long lukim husat tru bai bung wantaim

Hekari long kamapim namba tu tim bilong Sauten Konfederet.

Dispela tripela tim em NCD Pot Mosbi Yunaited, Bogenvil FC na Eastern Sta FC. Dispela tripela tim bai pilai strong tru long dispela las gem long kisim poin long go antap long namba tu ples.

Pot Mosbi Yunaited i stap long 23 poin na FC Bogenvil na Eastern Sta i stap long 21 poin. Dispela wiken ol dispela tripela tim mas winim gem bilong ol long dispela las gem.

Bogenvil FC na Eastern Star i gat wankain gem pilai na ol gat planti ol yangpela mangi husat i soim pes long NSL long dispela yia. Pot Mosbi Yunaited i save senis pilai bilong ol-

geta wiken. Taim we pilai bilong em i isi ol bai pilai strong na tim husat save pilai strong ol bai pilai isi. Dispela gem plen bilong ol save paulim planti tim long NSL Sauten Konfederet.

Gavana bilong NCD bai amamas tru sapos Pot Mosbi Yunaited winim gem bilong em long dispela wiken long wanem NCDC em sponsa bilong ol.

FC Bogenvil i no gat sponsa bilong ol, tasol i boi bilong San Kamap i stap strong na bung wantaim long raun wan i kam inap long dispela wiken bail as gem bilong raun tu. Sapos ol boi Bogenvil i winim gem bilong ol long dispela wiken na skorim planti gol, dispela bai mekim ol i go

antap long Pom Yunaited wantaim Eastern Star.

Sauten Konfederet i gat 8-pela tim i resis long Kumul Petroleum Nesanel Soka Lig na Noten i gat 6-pela tim. Hailans i gat 4-pela tim na Niugini Ailan i gat tripela tim. Sapos Sauten Konfederet i kisim tripela top tim na go insait long narapela raun, dispela bai lukim Pom FC, Bogenvil FC na Eastern Star bai gat bikpela sans long stap insait long go pilai long narapela fainal raun bilong NSL.

Dispela wiken bai PNG Futbal Stadium bai pulap long ol sapota bilong dispela tripela tim husat bai resis long kisim namba tup les bilong Sauten Konfederet.



# Difending sempion Lahanis i lus long Dabaris

**Jacklyn Kimala i raitim**

**DIFENDING sempion BINTANGOR Goroka Lahanis i bin lus long raun foa bilong Digicel Kap las wik Sande long Pot Mosbi.**

Lahanis i bin resis wantaim ol Dabaris long raun foa tasol ol sempion i bin abrus na larim ol Dabaris long daunim ol.

Tupela tim wantaim i bin soim strong bilong ol insait long fil tasol Dabaris i gat strong moa taim ol i bin daunim Lahanis wantaim 4-pela poin.

Long namba wan hap bilong gem Lahanis skoim namba wan trai wantaim gutpela kik tasol Dabaris i no larim Lahanis long nilim ol long

namba wan hap. Long wankain taim fulbek bilong Dabaris bekim trai bilong Lahanis tasol kik abrus na skoa stap 6-4, bihain long Lahanis kikim penalti gol na kisim 2-pela moa poin na hap taim skoa 8-6.

Wankain long namba tu hap bilong gem Lahanis lusim paul bilong ol na sek long bikipela walabi Dabaris long daunim ol wantaim foapela poin.

Long namba tu hap bilong gem ol Dabaris i bin pilai strong wantaim difens bilong ol long daunim Lahanis wankain olsem namba wan hap tasol Dabaris winga Kostka Tobata skoim gutpela kona trai wantaim gutpela kik bilong fulbek. Dispela i no bin

kamapim wanpela senis long Lahanis long strongim difens, tasol dispela i bin daunim pawa bilong Lahanis na hapim pawa bilong Dabaris.

Gem i bin tait inap klostu ful taim na 11 minit tasol na namba sikis putim magik trai bilong ol Lahanis wantaim gutpela kik bringim skoa stap 18-14.

Sempion Lahanis traim hat long kisim bek dispela foapela poin ol misim long tupela kik bilong ol. Sapos kik bilong ol i bin gutpela tupela tim inap dro.

Tasol Dabaris i bin pilai strong long mekim Lahanis long lusim dispela foapela poin na ol i bin stap 18-14.



BINTANGOR Goroka Lahanis pait strong long holim taitel bilong ol taim nupela tim Sentral Dabaris i laik rausim dispela taitel long ol. (Poto Jacklyn Kimala)

## Butter-flies plai antap long Hohola-flies



Hohola Flies pilai i bin holim bal strong tasol Butterflies holim lek bilong em na lokim ol wantaim 2-pela poin. (poto Jacklyn Kimala)

**Jacklyn Kimala i raitim**

**BUTTERFLIES** i bin plai antap wantaim tupela poin tasol las wik Sande long Oil Search Nesenel Futbol Stadium long wankain taim.

Sevenpela gem olgeta i bin resis long PRL kompetisen na i bin pulim ai bilong planti manmeri long sapot na lukim gem bilong ol wankain olsem Digicel Kap.

Long A-gret ol Brothers i bin autim ol Dobo Warriors 18-4 poin, na dispela i mekim ol bai pilai yet long narapela

pela sait taim Dabaris na Lahanis i bin resis tu insait long Nesenel Futbol Stadium long wankain taim.

Sevenpela gem olgeta i bin resis long PRL kompetisen na i bin pulim ai bilong planti manmeri long sapot na lukim gem bilong ol wankain olsem Digicel Kap.

Long A-gret ol Brothers i bin autim ol Dobo Warriors 18-4 poin, na dispela i mekim ol bai pilai yet long narapela

raun bilon gem. Bihain long dispela ol Hawks winim West wantaim 14-12 poin, Magani daunim Kone Tigers wantaim 18-16 poin na bihain ol Tarangau wantaim Royals dro na Defense nilim Souths 20-0.

Bihain ol Butterflies winim Hohola Flies 8-6 na Kone Storms nilim ol PAGA 10-0 long wankain taim tasol.

Gem bilong olgeta tim i bin strong wankain olsem Digicel Kap tasol wanpela bilong ol wan-

wan tim tasol win na arapela i mas wok hat gen long narapela raun bilong gem.

Hohola Flies i laik ranawe wantaim bal tasol Butterflies i bin lokim ol wantaim 2-pela poin inap fultaim.

Tupela flies wantaim i bin laik plai antap tasol Hohola Flies em nem bilong ples na painim hat long abrusim ol Butterflies i bin plai antap wantaim 2-pela poin 8-6.

## Snax Tigers win foapela raun olgeta



Poto kepsen: NCDC Vipers i bin painim hat long takolim Snax Tigers pilai long namba tu hap bilong raun foa Digicel Kap.

**Jacklyn Kimala i raitim**

**SNAX** Tigers i bin winim ol NCDC Vipers long raun foa bilong Digicel Kap las wiken long Pot Mosbi.

Dispela resis i bin kamap namel long tupela strongpela tim bilong Digicel Kap kompetisen tasol Vipers i bin pilai wan man gem na givim planti sans long Tigers long skoim moa trai.

Tupela tim long namba wan hap i bin balens long takol, holim bal na pasim bal bihainim ol trai ol i bin skoim.

Tenpela minit i bin go pinis long namba wan hap bilong gem na ol Tigers i bin holim bal klostu long trai lain bilong Vipers, faiv eit bilong Tigers Mark Tony pilai liklik giaman bilong em na pasim senta bal stret long ful bek Sonny Wabo long skoim senta trai na

wantaim gutpela kik i bringim skoa i go long 6-0.

I no long taim na Tigers kikim narapela gutpela penalti go ken go insait na givim hap taim skoa 8-0.

Insait long narapela 40 minit bilong namba tu hap tupela tim wantaim strong na mekim ol sapota tingim husat bai winim gem inap Tigers autim Vipers.

Vipers i bin givim planti moa sans long Tigers long putim moa skoa tasol no gat wanpela trai i bin kamap insait long dispela ol sans.

Hap bek bilong Tigers Towari Kenake i bin putim narapela kalap kona trai tasol kik i bin abrus na givim Vipers wanpela sans long skoim trai. Kik bilong ol i abrus na putim skoa 12-4.

Long wankain taim namba tu, namba sikis

na namba seven bilong Tigers i putim trai wantaim olgeta gutpela kik bringim skoa bilong ol go antap abrusim Vipers 28-4 poin.

Dispela em gutpela bilong Tigers tasol salens bilong Vipers i mas wok strong long kamap wankain olsem Tigers long narapela raun bilong Digicel Kap.

Tigers winim foapela raun olgeta Digicel Kap na nau ol redi long dispela wiken wantaim ol Hagen Eagles long Lae.

End// Poto kepsen: NCDC Vipers i bin painim hat long takolim Snax Tigers pilai long namba tu hap bilong raun foa Digicel Kap.

poto 2: Rait winga bilong Vipers Rex Tandoa holim bal na traim strong bilong em wantaim ol Tigers. (Poto Jacklyn Kimala)



Andrew Lepani bilong Eastern Star i tromoi lek long stopim straika bilong Star Maunten long NSL pilai bilong ol long wiken. Eastern Star i win 2-0.

Winga bilong Star Maunten i traim long rausim bal long lek bilong mid-filda bilong Eastern Star.



Basil Jofari bilong FC Bogenvil i stopim bal long brus bilong em taim pilai bilong FC Gulf Komara i traim long rausim long en. Tupela tim i dro 0-0.

Rait fulbek bilong FC Komara i redi long mekim baisikol kik taim Julai bilong FC Bogenvil i kam long banisim em.



NCDC Pot Mosbi Vipers pilaia i redi long kam kisim malolo bihain long namba wan hap bilong pilai bilong ol.

Lae Snax Tigers i redi long kisim malolo. Ol i bagarap stret bikipela siti Pom Vipers 28-4.



Ful bek bilong Lae Snax Tigers i kisim bikipela win long redi long brukim banis bilong Vipers. Em i mekim planti gutpela pilai na skorim namba wan trai bilong Tigers.

Hap bek bilong Vipers i go daun long trai lain bilong Tigers long putim wanpela trai tasol bilong Vipers. Ol poto Nicky Bernard.



# Muruks gat strongpela bilip-Rami tok

Jacklyn Kimala i raitim

PRK Mendi Muruks i gat strongpela bilip long pilai strong gen bihain long Rabaul Gurias i bin daunim ol las wiken long Mendi.

Kepten bilong Mendi Muruks Abel Rami i tok ol i bin lusim tripela gem na wanpela win insait long foapela raun bilong Digicel Kap.

"Gutpela ol i lus na bai ol i lainim rong bilong ol na traim pulim sokis long ol arapela raun bilong gem," Rami i tok.

Rami i tok planti bilong ol Muruks pilaia em ol yangpela man husat i kam stret long lokal lig tasol wantaim gutpela sapot bilong kosa Glen Nami i bin mekim bikipela senis long gem bilong ol wan wan.

Em i tok bikipela tenkyu long kosa bilong ol long givim ol strongpela stia toktok na strongim ol long taim bilong gem.

Em i tok bai ol i ken mekim bikipela senis sapos ol wok bung wantaim olsem wanpela tim na bihainim wanem trening skil kosa givim ol.

"Tasol dispela em i no wanpela hevi sapos ol i yusim bal gut na strongim difens bilong ol," Rami i tok.

"Planti bagarap i save kamap long fil taim i no gat gutpela tim wok tasol Muruks bai go yet bikos planti talen pilaia stap insait long tim," em i tok.

Em i tok, "Mipela bai i no inap poinim pinga long narapela pilaia insait long fil, tasol bai mipela traim bihainim toktok bilong kosa Glen Nami na pilai."



OL SPOT POTO  
LONG - PES 27

## Smail Wantaim



Good Products, Better Prices, ikam long

### Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

Ol samting long klinim tit.